## CBETA電子佛典集成

CBETA Chinese Electronic Tripitaka Collection ebook

T13n0414

# 菩薩念佛三昧經

劉宋 功德直譯

### 目次

- 編輯說明
- 童節目次
  - 。<u>1 字品</u>
  - 。2 不空見本事品
  - 3 神通品
  - 。 4 彌勒神涌品
  - 。 5\_ 讚佛音聲辯才品
  - 。 6 讚如來功德品
  - 。 7 如來神力證正說品
  - 。 8 不空見勸請品
  - 。9 讚三昧相品
  - · 10 下觀品
  - · 11 微密王品
  - ∘ 12 三法品
  - 13 勸持品
  - 。 14 諸菩薩本行品
  - 15 正念品
  - · 16 大眾奉持品
- 巻目次
  - · 00.1
  - · 002
  - 003
  - · 004
  - · 005
- 贊助資訊

#### 編輯說明

- 本電子書以「CBETA 電子佛典集成 Version 2022.Q1」為資料來源。
- 漢字呈現以 Uni code 3.0 為基礎,不在此範圍的字則採用組 字式表達。
- 梵文悉曇字及蘭札字均採用羅馬轉寫字,如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題,歡迎來函 service@cbeta..org 回報。
- <u>版權所有</u>,歡迎自由流通,但禁止營利使用。

No. 414 [No. 416]

菩薩念佛三昧經卷第一

宋天竺三藏功德直譯

#### 序品第一

#### 如是我聞:

一時佛住王舍城耆闍崛山,與大比丘眾一千二百五十人俱,皆是阿羅漢——諸漏已盡,無復煩惱,調伏縱任,善脫無脫,深知無知,所作已辦,逮得無我,捨諸重擔,除滅九結,決定解脫,諸心自在,猶如大龍——唯除阿難。

爾時,難陀天子、修難陀天子、栴檀天子、修摩那天子、自在天子、大自在天子、阿逸多天子、修行天子,如是無數淨居天子,於夜後分光色倍常,耆闍崛山欻然大明。時諸天子往世尊所,一心恭敬頂禮佛足,以天細末栴檀之香、多摩羅跋沈水天香、天花鬘香、俱修摩等種種花香,以散佛上。重禮佛足,右遶三匝,却住一面,合掌向佛。

時栴檀天子默然生念:「過去諸佛皆為諸天、世人、沙門、婆羅門 演諸佛所說菩薩念佛三昧。」復作是念:「今我世尊亦應如昔過去 諸佛,安樂世間諸人天故,宣說菩薩念佛三昧。」

時諸天子俱白佛言:「世尊!過去諸佛皆說菩薩念佛三昧,安樂世間人天八部,唯願世尊如昔諸佛,廣為眾生說此三昧。」爾時,世尊默然許之。時諸天子遶佛三匝,頂禮佛足,忽然不現。

爾時,世尊於夜後分明相出時,熙怡微笑,作大師子[口\*磬]咳之聲。耆闍崛山別住諸僧承佛神力俱到佛所,王舍大城諸比丘尼蒙佛

威聲亦悉同集,摩竭提國阿闍世王、先尼梵子與無量億眷屬圍遶, 承佛神力於一念頃俱到佛所。復有阿羅婆迦夜叉、伽陀婆夜叉、金 毘羅夜叉、修脂路摩夜叉、摩羅陀利夜叉,如是等夜叉神王有大威 力,一一皆有百千眷屬,乘佛神力於一念頃至耆闍崛山。復有羅睺 羅阿修羅王、毘摩質多羅阿修羅王、修婆睺阿修羅王、波呵羅頭阿 修羅王及其眷屬。如是,乃至三千世界,天龍、龍王無量無邊,生 希有心,肅然毛竪,承佛神力於一念頃往到佛所。東方世界如恒河 沙梵天天王,聞佛謦咳肅然毛竪,往到佛所;自餘三方及上、下方 亦復如是。

時給孤獨須達長者亦與無數百千眷屬從舍衛城往到佛所。時毘耶離 有大長者名曰善思、次名降怨、次名吉祥;復有離車諸王子等名歡 喜象、次名舉象;復有斷事庶士首陀名曰光象;如是一切皆大乘 學,與無量眾承佛神力往到佛所。時瞻婆城有庶士子名曰庠序、次 名饒益;復有大長者子名無量力;如是等眾已於過去種諸善根,有 大威德,承佛神力往到佛所。時波羅奈無量眾生,宿殖德本今已成 熟,從波羅奈鱗次相繼步至佛所,稽首作禮,侍立左右。

是時拘尸那竭大城無量力士及力士子,已於過去供養諸佛、殖諸善業,具大威德,從拘尸那共相和順,隨路貫次往到佛所,至心恭敬前頂禮足。

是時三千大千世界縱廣正等,佛神力故。一切八部——天、龍、夜 叉、乾闥婆王、阿修羅王、迦樓羅王、緊那羅王、摩睺羅伽如是等 眾——皆來集會,間無空缺。

爾時,世尊見眾已集,復更發大師子之聲,從僧坊出近至異處,遙 見彼方其地眾寶,世尊見已復更微笑。即時世間人、天、阿修羅, 各持無量末香、雜花以散佛上,至心恭敬、尊重、讚歎。 是時,眾中長老舍利弗、長老大目揵連、長老摩訶迦葉、長老須菩提、長老富樓那彌多羅尼子、長老羅睺羅、長老摩訶金毘羅、長老摩訶迦旃延、長老阿義樓馱、長老劫賓那、長老輪盧那二十億子、長老難陀、長老阿難陀——皆有威德,具足神通——如是聖眾悉已俱集。

爾時,眾中長老彌勒菩薩、三界菩薩、越三界菩薩、初發心即轉法輪菩薩、善思菩薩、大音聲菩薩、持地菩薩、文殊師利童子菩薩、不空見菩薩,如是等眾無量無邊,已曾供養過去諸佛,深種菩薩無數行願,久發無上菩提之心。

爾時,長老不空見菩薩欲知如來神通之相、微笑之意,更正衣服, 遠佛三匝,却住一面,合掌向佛即說偈曰:

「最勝無為,兩足世尊,為調御故, 現斯熙怡。富能開惠,令貧滿足, 佛演法施,明發亦然。一切世間, 之所歸趣,以何因緣,示此微笑? 無上正覺,願為我說。」

爾時,世尊告不空見:「汝見彼處眾寶地不?」

不空見言:「唯然,已見。」

「如是,不空見!彼地乃是往昔諸佛之所遊化。」

時不空見心自念言:「我宜速疾至彼地所。」如其相貌,心入三 昧。入三昧已,為佛世尊化作種種眾寶法座。即如其念施置座已, 往詣佛所,勸請如來昇此寶座,白言:「世尊!此處皆是往古來今 諸佛如來遊踐之地。」

是時世尊往到彼處即就法座,於一念頃,如來、應、正遍知力故, 此剎三千大千世界六種震動——踊、遍踊、等遍踊,震、遍震、等 遍震,吼、遍吼、等遍吼,動、遍動、等遍動,搖、遍搖、等遍搖,起、遍起、等遍起——東踊西沒、西踊東沒,南踊北沒、北踊南沒,西踊東沒、東踊西沒,北踊南沒、南踊北沒,光明遍照無量世界。一念之間,一切眾生乃至阿鼻地獄,悉受快樂。

「佛昇法座, 如日暉曜, 一切世間, 之所歸仰, 震動大千, 咸生欣悅。 佛登寶座, 如日顯照, 一切世間, 頂戴法王, 欲今眾生, 普獲安樂。 佛就座已, 如日融朗, 一切世間, 尊承法王, 放淨光明, 照諸剎十。 異哉!斯乘, 奇哉!斯乘, 乘之最勝; 無能過者。 暫現之處, 已不可量。 善哉!斯乘, 乘之弘大。 乘是乘者, 不可思議, 諸天、魔、梵, 所不能測。」

爾時,世尊廣長舌相遍覆三千大千世界,普告聲聞及眾菩薩:「諸善男子!一心靜聽。是夜,難陀天子、修難陀天子、栴檀天子、修 摩那天子、自在天子、大自在天子、阿逸多天子、修行天子,如是無數淨居天子,於夜後分光色倍常,耆闍崛山欻然大明。爾時,諸天來詣佛所,一心恭敬頂禮佛足,以天細末栴檀之香、多摩羅跋沈水天香、天花鬘香、俱修摩等種種花香以散佛上。重禮佛足,右遶三匝,却住一面,合掌向佛供養、恭敬、尊重、讚歎。是時,栴檀天子默然生念:『過去諸佛、應、正遍知,皆為人、天、沙門、婆羅門敷演諸佛所說菩薩念佛三昧,今我世尊亦應如昔過去諸佛,安樂眾生,宣說菩薩念佛三昧。』時諸天子作是勸請,我默然許。如是,比丘栴檀天子、難陀天子、無量淨居諸天子等知我許已,忽然不現。」

#### 爾時,世尊即說偈言:

「告諸比丘: 『於後夜時, 諸天身色, 光炎倍常, 耆闍崛山, 欻然大明,

供養、尊重、 圍遶世主。 難陀天子、 善意天子、 善熹天子、 栴檀天子、 自在天子、 及大自在、 阿逸天子、 善行天子, 如是無量, 淨居天子, 有大神力, 來至我所。 廣設種種, 珍妙供養, 皆共恭敬, 右澆三匝, 頭面禮足, 却住一面。 栴檀天子, 教化眾生, 默然住已, 發心欲為, 念佛三昧: 「往昔諸佛, 請說菩薩, 善哉!釋迦, 十力如來, 已曾說故。 說三摩提, 欲令一切, 得安樂故。」 佛默然許, 時諸天子, 已知垂允。 如過去佛, 耆闍崛山, 我亦於此, 所說三昧。 時諸天子, 已知如來, 默然許之, 歡喜快樂, 右遶三匝, 禮足而去。』 比丘聽我, 所演三昧, 如昔諸佛, 莫牛疑惑, 如來智慧, 不可思議。 過去諸佛, 最上菩提, 如今現在, 於諸知見, 心無疑網。 第一菩提, 我皆了知, 心無滯礙。 若當來世, 欲成菩提, 欲為憐愍, 我亦明曉, 將來世故, 心無毫疑。 是故如來, 深解無窮, 智力無礙, 不可思議。 如彼所知, 我悉究盡, 一切眾生, 不測其奧。」

#### 菩薩念佛三昧經不空見本事品第二

爾時,世尊告長老舍利弗、長老目揵連、長老大迦葉、長老須菩提、長老富樓那彌多羅尼子:「諸天世人皆已來集,汝等比丘各昇法座作師子吼。所以者何?此眾多有諸聲聞人,聞師子吼悉得解脫。」

爾時,世尊告彌勒菩薩、越三界菩薩、不思議菩薩、不空見菩薩:「汝等即時請如來演諸佛所說真實功德師子吼音。」

#### 不空見言:「如是,世尊!唯然,已聞。」即說偈讚:

」身色如金, 百福莊嚴, 為憐愍故, 了達真諦, 功德具足, 名譽遠流。 於大眾中, 今日世尊, 以何因緣, 下覺無倫, 最上莫過, 今我請問? 功德法王。 大智難窮, 調伏世間。 於大眾中, 以何因緣, 今我請問? 定、智、解脫、 如來淨戒、 解脫知見, 悉皆無等。 今我善逝, 以何因緣, 於大眾中, 令我請問? 威德無比, 能為眾生, 得度彼岸, 法干世尊, 於大眾中, 作大利益。 善逝!何因, 習折悲處, 令我請問? 百劫修慈, 於大眾中, 善逝!何因, 辯才無滯。 令我請問? 最上法王, 普利群生, 貧者得富、 盲者得視、 禁 毒 永 息 、 恐畏獲安。 以何因緣 今我請問? 如來之衣, 佛身淨妙, 塵垢不污; 世尊族姓, 王中之王。 種種雜色; 以何因缘, 今我請問? 佛所著衣, 身能降怨。 去身四指, 而不離身, 如來行處, 以何因缘, 今我請問? 智慧力故, 所履皆平。 無諸坑坎, 以何因緣, 令我請問? 如來之身, 不增、不减; 行步平正, 不邪、不曲。 妙絕當倫, 難可思議。 以何因緣, 令我請問? 仰瞻尊顏, 目不暫彿。 神足之力, 佛行不假, 威儀自然, 庠序可觀。 若為魍魎, 之所捉持, 迷悶失心, 無所覺省; 若親世尊, 於一念頃, 諸惡永離, 還得正念。 觸佛足塵, 於七月中, 若有眾生, 命終之後, 身心快樂; 得生善處, 施一切樂。 歸命世尊, 若有人病, 即得除愈。 佛以手壓, 極受眾苦, 悉得一切, 不可思議, 善浙曠劫, 攝取當來, 無數安樂。 佛昔勇猛,

無量劫中,所得淨法。 我於是處,無疑異心。 以何因緣, 令我請問? 過去、當來, 天中特尊, 今遇調伏, 人中大仙。 以何因緣, 令我請問?」

爾時,世尊告不空見:「諦聽諦聽,善思念之。」

不空見言:「唯然,世尊!」

告不空見:「我憶往昔無央數劫,爾時有王名無量力,有大神通,勢力自在。是王住處造立大城,城名善建,縱廣正等十二由延。其城七重,面有三門,門城皆以金、銀、琉璃、頗梨、馬瑙、真珠、珊瑚莊校嚴麗。塹亦七重,皆悉七寶。是諸門外,以金、銀沙布飾其地,一門兩邊各有金、銀四闕相對。

「如是,不空見!又以金、銀作大羅網彌覆門上,金網處處懸於銀鈴、銀網往往垂於金鈴,風吹鈴網皆作箜篌、樂器之聲,宮商調暢更相應和。王造城已,安處其中。斯城塹外有七池沼,金、銀、頗梨、珊瑚所成。此諸池沼有七階道,亦是七寶之所莊校:金階道者,銀為欄楯;銀階道者,金為欄楯;銀為階道,真珠欄楯;真珠階道,琉璃欄楯;頗梨階道,珊瑚欄楯;珊瑚階道,真珠欄楯;真珠階道,金為欄楯。如是,不空見!無量力王植眾奇花:優鉢羅花、鉢頭摩花、拘物頭花、分頭利花、那梨尼花,香氣調柔,無悋惜者,隨意採之。其池岸上種種花樹,所謂伊曾花樹、尼曾花樹、迦多曾尼花樹、阿提目多迦花樹、瞻蔔花樹、婆利師花樹、拘毘陀羅花樹、陀冕迦梨花樹。此諸花樹氣若天香,亦無守護,隨意而取。

「又,不空見!是善建城有多羅樹七重行列,悉以七寶互相間錯: 金多羅樹,銀葉、花、果;銀多羅樹,赤真珠葉,花、果亦然;白 真珠樹,琉璃為葉,花、果亦然;琉璃樹者,頗梨為葉,花、果亦 然;頗梨樹者,馬瑙為葉,花、果亦然;馬瑙樹者,赤真珠葉, 花、果亦然;赤真珠樹,珊瑚為葉,花、果亦然;珊瑚樹者,金為 其葉,花、果亦然。

「不空見!風吹諸樹,更相振觸出微妙聲,譬如樂師善能擊發五種 之音。

「又,不空見!王所住處如是眾聲恒不斷絕:象聲、馬聲、車聲、 軍聲、螺聲、鼓聲、簫聲、笛聲、箜篌、琵琶、歌舞之聲,如是眾 聲未曾暫廢。王常宣令境內人民:『若有所須衣服、飲食、象馬車 乘,恣隨其意一切給與。』多羅樹間常出樂音,諸人遊之五欲自 娛。王視國人如父念子,一切奉王猶若慈父。

「又,不空見!善建城內開諸街巷、壓邑、市肆。處處復有四寶池 沼,其池相去盡一箭道,是池四岸眾寶階陛:金階銀欄、銀階金 欄,頗梨、珊瑚間錯亦然。

「又,不空見! 王於諸池植眾名花,復於池上種雜花樹: 伊尼曾花樹、迦曇婆花樹、阿提目多伽花樹、瞻蔔花樹、陀冕迦利花樹,芳如天香,亦無惜者。城內又建諸園林觀,種種花果行列其間。復於園中四方周匝,處處皆有諸妙花池,亦以七寶莊嚴如前。有眾婇女更相娛樂,一切人民恣意遊適。

「又,不空見!無量力王族姓豪傑,大剎利種,所生父母乃至七世 冑胤相承,悉皆清淨。容色端雅,人中獨絕,財寶巨億,不可稱 計。

「又,不空見!無量力王深信弘惠,虚心大施,施諸沙門及婆羅門,乃至盲、聾、癃殘、百疾、貧窮、孤獨、困厄之人。王所統領八萬四千城邑聚落,淨業果報,七寶莊飾,一一城上復造八萬四千栴檀眾妙樓櫓。是諸門外開四衢路,路首悉起嚴麗臺觀,一切人民

任意遊戲。常於晝夜,樓觀、臺殿、巷陌、鄽里悉然燈燭,其明猛 盛遍照國界,眾生蒙光身心快樂。

「又,不空見!王有二子:一名師子,二名師子意,久發無上菩提之願,名稱遠聞,具大威德。爾時有佛,號曰寶扃如來、應、正遍知、明行足、善逝、世間解、無上士、調御丈夫、天人師、佛、世尊,出現於世,作是唱言:『我於今世及以後世,沙門、婆羅門、天、人、阿修羅大眾之中,一切知見。』普為群生說諸妙法,初、中、後善,語善、義善,具足清白梵行之相,與大羅漢七百千萬億,皆具神通,威德自在。

「寶局如來於晨朝時,齊整衣服,執持應器,比丘翼從,入城乞食。時無量力共其二子在高樓上歡娛受樂。王遙覩佛功德相好,生奇特心,欣躍無極。眷屬圍遶,俱到宮門,告其二子:『速齎香花、幢幡、伎樂,疾至佛所。』即以牛頭栴檀、末香、諸妙珍異以供養佛及比丘僧,右旋三匝,頭頂禮足,却住一面。

「又,不空見!王與二子請寶局佛及聲聞眾,盡其形壽施諸所安。 寶局如來於天人中教化已周,將般涅槃。時王知佛不久住世,與其 二子、臣民、眷屬前後導從至涅槃所——如來爾時滅度已訖——頭 面敬禮,悲號啼哭,以身投地如大山崩,作是唱言:『世間眼 滅。』重更哀嗟:『世間眼滅。如來涅槃一何駛哉?猶商失主,佛 滅亦然。世間黑闇,盲無慧目。』搥胸拍頭,舉聲大叫,嗚咽捫 淚,告其二子:『辦諸香湯洗浴如來。』又以種種妙香塗身,一切 散花及諸花鬘、無量妙衣纏如來身,七寶為棺,以鐵為槨,聚赤栴 檀高一由旬,縱廣正等一拘盧舍。復以花香散於[卄/積]上,蘇油 千器以灌栴檀,然後起火。火既發已,復更號慟,灑淚如雨。

「爾時,師子作是念言:『世尊涅槃,我生何為?亦當隨佛入於涅槃。』立此誓訖,重以種種珍妙香花散於[卄/積]上,白氎纏身,

手執火炬,自投火中,火即猛盛,為利眾生歸依世尊而說偈願讚詠如來:

「『如大珍寶聚, 世間之所尊, 生死苦永盡, 於斯般涅槃, 自從今已往, 不覩轉法輪。 已入於涅槃, 我所奉法王, 官揚廣大義, 不可復重布。 何當在大眾, 聞說於菩提? 諸天及世人, 歡喜讚善說, 絕不思議聲。 我於今日後, 世間勝調御, 於此而沈淪, 龍、神、阿修羅, 及以緊那羅, 欣悅常歌歎, 不復聞斯音。 貧者得滿足、 苦惱蒙救護, 世尊今涅槃, 悉喪所依怙。 父干無量力, 及弟師子意, 亦復無慈蔭, 更不聞說法。 我亦隨世尊, 揀取於滅度。 何用苦牛為? 世間無明道, 今焚此毒身, 願獲不思議。 常於長夜中, 我昔與父王, 勤供佛、法、僧, 今得獲果報。 若我於佛所, 修習諸善行, 為調伏世間, 得不思議故。 發不思議願: 為令諸眾生, 世尊般涅槃, 我投火盛時, 若人見聞者, 切得成佛, 唯除邪謗人, 及證正位者。 若我修菩薩, 廣大無量行, 眾生夢見者, 皆令得佛道, 唯除邪謗人、 及證正位者。 此身如聚沫, 要當必有死, 一切眾牛類, 若食我肉者, 是等不可量, 疾當得成佛。 惡口罵詈者, 我修菩薩行, 必當得成佛, 是人值調御, 及證正位者。 唯除邪謗人,

```
若人於我身,
        修於慈悲觀,
求第一菩提,
        速得成佛道,
        及證正位者。
唯除邪謗人,
以是燒身緣,
        為求彼此願,
        即還見佛起。
若我心真實,
設得更親佛,
        如先住世者,
我身投火中,
        猶前侍佛時。
        今覩不異昔,
佛起如真身,
爾乃證諸佛,
        相續常不斷。
唯願普眼尊,
        熬攝於世間。』
佛知王子心,
        渴仰甚殷重,
即於焰聚中,
        奮大神涌力。
如從三昧起,
        光明倍明顯,
不可思議眾,
        咸歎未曾有。
廣為時會人,
        更作大利益,
所化既已畢,
        還入於涅槃。
        示大威神力,
師子既見佛,
        坦然快安樂。
身心甚欣悅,
深知諸佛法,
        不可得思議,
        猶應眾生願。
如來雖涅槃,
『不思議戒、定、
          智慧與解脫,
        神化不可量。
及解脫知見,
歸依於世尊,
        然後當放身。
世間妙威儀,
        最勝無倫匹;
自在諸神力,
        亦復無等雙。
如來環涅槃,
        一切咸驚惋,
是故我至心,
        歸依普眼尊;
歸命於善逝,
        累盡無為主;
        憐愍於世間。
歸命永離苦,
下智编觀察,
        了達知他心,
除諸煩惱病,
        成就無量眾。
大醫人中尊,
        施不思議藥,
能善除世間,
        一切眾疾苦。
        哀矜眾生者。
歸依無上師,
若我讚如來,
        一念之功德,
        須臾供養福,
燒身微毫善,
如是諸淨業,
        願施於一切。』
```

「如是,不空見!時天、魔、梵及餘一切世間人民,悉見師子投身盛火,皆大悲愕,生奇特心。命終之後即生梵天,有大神力、威勢、自在。是梵爾時中心念言:『云何忽然來生此間?』重更思惟:『往昔人中已曾奉侍寶肩如來,至心恭敬、尊重、讚歎。佛涅槃已,燒身供養,復說偈頌、發弘誓願,乘此善業得生梵天。我今當往至燒身所。』是梵即時忽然不現,譬如壯士屈申臂頃,便到如來闍維之處,以天栴檀、沈水碎香、俱修摩花、多摩羅跋,種種香花不可稱數,遍散空中如雨而下,十方交紛若風旋雪,供養寶肩如來舍利。向無量力說其本緣:『我是王子師子之身一一投火供養命過之者——唯願大王不加慈念。我今已蒙獲諸善利,由昔至誠虔恭奉侍、尊重、歌歎寶肩如來功福果報得生梵天。是故,大王與師子意應共珍敬受持妙法,收取舍利分布供養,無令遺落而生懈怠。大王當知,我生梵天亦常敬持受此勝法。』作是言已,忽然不現。

「又,不空見!無量力王與師子意取水滅火,以諸妙香、眾花、寶鬘、幢幡、伎樂,種種供養。須臾之頃,周遍八萬四千城邑悉起八萬四千塔廟,皆以七珍莊校嚴麗。是諸寶塔高一由延,縱廣正等一拘盧舍,於一一塔周匝各然八萬四千眾香油燈,是諸塔間復以種種香花、伎樂供養如前。尊敬受持如此妙法,無量力王以是善根,與師子意經歷八萬四千劫中不墮惡道,又於八萬四千億劫親近供養六萬諸佛,次第奉敬常不斷絕,世世恒作轉輪聖王。

「又,不空見!寶局如來涅槃之後,時有菩薩現於世間,名普密 王。為愍世間出家學道,菩提樹下結加趺坐,一心定意,正智解 脫,豁然大寤,得無上道。

「又,不空見!是師子梵至普密王佛世尊所,住在虛空以天栴檀供養於佛,右遶三匝,稽首作禮,請轉法輪而白佛言:『唯願世尊從道場起,摧諸魔軍,於淨神智無所毀損。願世間師哀從定寤,調御有解諸聲聞眾,開演美妙善逝之法。如來前身久修智慧、攝受善

法,今為人尊。過去世中已發弘誓:「願得佛時當度未度。」今願 已滿,得安隱處,最勝無為,寂然妙樂,當開甘露解眾三結。』爾 時,世尊默然許之。

「時彼大梵及無數天既知如來當轉法輪,咸共歡喜,踊悅無量。梵 天于時設諸妙供,即發大願求無上道:『遇普密王應正遍知,生我 淨妙功德之聚,以此果報於生死中常得親近覩十方佛。若我供養佛 菩提樹,如是種種所修功德,願慈愍故為我說法,以此果報於生死 中常得讚歎諸佛塔廟。』

「又,不空見!師子王子燒此一身,以是功德所修善根恒住梵世, 值五千佛,供養、敬侍、尊重、讚歎,殖諸善根,發不思願。汝不 空見莫生此疑,時無量力王豈異人乎?我身是也。」

時不空見即白佛言:「是二王子為今現在?為已滅度?唯然,世尊!願為說之。」

告不空見:「爾時王子師子意者,彌勒是也;時師子者,汝身是 也。王子師子捨此一身,寶局如來佛法之中,教化成就三萬眾生安 住阿耨多羅三藐三菩提心。」

#### 爾時,世尊即說偈言:

王於臺觀上, 遙覩調伏仙, 寶肩天人師, 翼從諸比丘。 時王與二子, 竦抑人中尊, 既至如來所, 即廣設妙供。 頂禮澆三匝, 却立合堂住, 請佛及眾僧, 盡壽奉所安。 衣服及餚饌、 極世之珍異, 八萬四千歲, 奉施未常息。 時王及二子, 靜心求菩提。 收取尊舍利, 時佛既滅度, 為彼寶肩佛, 敬造七寶塔。 微妙甚端雅, 八萬有四千, 八萬四千燈。 -佛塔然, 復於善逝處, 時王無量力, 香花、眾伎樂, 深心以供養。 已種不思議, 無量諸善根, 歷事六萬佛, 一切世間依, 至誠求第一, 無上勝菩提。 比丘!莫疑惑, 往昔有國王, 汝善聰慧者, 勿生於異見。 時彼無量力, 今則我身是。 雜花及眾香、 書夜明諸燈, 為利閻浮提, 供養諸如來。 布施恒不足, 聞法亦復然, 一心求菩提。 曾無賴惰意, 無上大明智。 寶 信 下 覺 尊 , 汝昔曾燒身, 供養於大仙, 自投猛焰中, 初無畏苦心。 燒身如然炷, 以油渧其上, 譬如淨燈炷。 漸漸不頓盡, 為利眾生故, 供養涅槃佛。 彼佛已燒身, 汝知方便請, 親佛從火起, 光明更明顯。 見佛不異昔, 心生恃怙想, 即時捨此身, 為益一切故: 『若我果斯願, 敬佛亦如前, 不可得思議。 所獲諸功德, 攝受先世業, 我若有宿願,

合集百千萬, 必當得見佛。 佛應從火起。』 我願若真實, 佛智甚清淨, 究竟無染著, 澹然常寂滅, 相續恒不斷。 知師子小淨, 亦先照其意, 佛便從火起, 相好更殊特。 世間怙既起, 不空見菩薩! 彼復發誓願, 一切願無餘。 其願不思議, 不可得稱數。 法主矜世故, 起於猛焰中, 善逝難思力, 光明更殊勝。 皆悉懷驚愕, 彼時一切眾, 淨心發高歎, 欣躍未曾有: 『奇哉!大神通, 勢力無倫匹, 不可得思議。』 甚深佛境界, 一千諸眾生, 見此神變已, 於諸法不受, 善得心解脫。 不空見當知, 師子為世間, 請佛還起時, 一千諸眾生, 於彼善浙處, 親佛神變化, 其心正趣向, 無上菩提道。 大悲為世間, 廣作利益已, 佛環入涅槃。 師子亦捨身, 即於命終時, 忽然生梵天。 梵天從上來, 以天栴檀末, 如來闍維處。 散之以供養, 寶 局滅度已, 有佛普密王, 最勝人中尊, 天王之大仙, 哀愍眾生故, 出現於世間。 是佛坐道樹, 得成菩提已, 梵天設美餚, 供養於世尊, 請佛轉法輪。 頭面接足禮, 普密王如來, 即知梵天心, 默然而許之。 梵天大欣慶, 更發諸大願。 復於燒身所, 是梵已曾修, 不可思議善。 昔於一劫中, 供養五千佛, 至心敬世尊, 奉侍人中尊。

『慎莫懷疑惑, 又告不空見: 汝若有聰慧, 勿生於異見, 昔日梵天者, 今即汝身是。 過去五千佛、 善拼般涅槃, 我悉明見汝, ·諸佛前, 求第一菩提。 燒身以供養, 過去多千佛, 滅度遺舍利, 如是諸佛所, 捨身及手、足。 為利眾生故, 修習菩薩行, 折世及猿世, 我悉咸了知。 常於百千生, 勤修諸苦行, 佛在及涅槃, 汝願恒滿足。』 復告不空見: 『如此諸大願, 無量百千生, 攝取過去世, 我住自在力, 今悉照知之。 汝聖果成就, 即時皆明見, 攝取不思議, 直實諸行等, 供養兩足尊, 住佛前讚歎, 是故今勸請, 眾聖之法王。 普密王佛所, 攝取最勝願, 汝今獲此果。』」 蒙佛現神通, 不空見菩薩, 白言牟尼尊: 「百千生諸願, 云何得攝取? 令我得開解。」 願少為敷拆, 「不空見! 昔誓: 『雷音成佛時, 見坐菩提樹, 我當請說法。』 先佛名帝幢, 普眼之世尊, 一切諸眾生, 所共歸依處。 是時廣發願, 求無上菩提, 為日光如來, 作大七寶輪。 汝時於彼處, 已發最勝願, 不空見菩薩! 此願我悉知。 造七寶僧坊, 雜色以莊嚴, 奉今修伽陀, 廣施未來佛。 發此誓願已, 即時而捨去。 第一眾尊佛, 人中上師子, 善生之世尊。 名不可思議, 端飾甚微妙, 奉上七寶蓋,

天中天大仙, 蓋身普眼佛, 明燈供養已, 是處發大願。 折世及遠世, 多有諸如來, 千億那由他, 其數復倍上, 於是諸佛所, 發無量大願, 今一切眾生, 悉獲快安樂。 普密王佛前, 先生如是念。 我今說汝昔, 修行至菩提, 願一切大地, 皆牛種種花。 雲雷音佛所, 為利世間故, 爾時發誓願: 『若有諸眾生, 聞我名字者, 一切皆得佛。』 設大珍妙供。 於帝幢佛所, 『若眼見我者, 復發諸善願: 皆當得成佛。』 於此世界中, 在日光佛所, 奉上七寶輪, 無量大光焰, 炫晃甚輝麗。 誓牛佛剎十。 時復發願已, 七寶嚴僧坊, 雜色甚雅好, 以此珍奇特, 奉施於善浙。 又發誓願已, 得天妙宮殿, 斯處快歡樂, 皆悉成佛道。 人中師子王, 無上如來所, 發於殊勝願: 奉上珍寶蓋, 『願諸眾牛類, 不為日所曝, 無復熱惱患。』 身心得安樂, 供施燈明已, 蓋身善逝所, 復發弘誓願: 『若我命禍處, 眾牛食肉者, 願皆成佛道; 若聞我名者, 無有貪恪心, 乃至夢中聞, 亦無愛惜意, 一切成佛道, 唯除見諦者。』 除諸貪、嫉意, 若眼見汝者, 書夜夢見時, 亦捨染恪心, 一切當得佛, 唯除見諦者。 或生憎嫉者, 若有愍念汝、 是等於汝所, 當得佛法王。 若汝臨終時, 又勤求菩提,

我今如實說, 汝之真功德, 必於當來世, 獲是無上尊。 『若有處水、陸、 空行眾生等, 食我身肉者, 願悉得成佛。』 我已知汝為, 安樂眾生故, 滿足大千行。 勤修菩薩道, 眾生多疑謗, 是故不顯現, 即時於是處, 如此眾生類, 若得信念等, 及以歡喜心, 悉當成正覺, 唯除見諦者。 若人願樂見, 世間所尊怙、 或樂轉法輪、 有樂勉眾苦, 是人為菩提, 利益故發心。 三世諸法王, 若有樂供養, 一切功德聚, 若人欲出生, 如是眾生等, 應持此三昧。」

爾時,世尊說是偈已,即從坐起,還入僧坊,於常靜室右脇而臥。

菩薩念佛三昧經卷第一

宋天竺三藏功德直譯

#### 神通品第三

爾時,長老舍利弗、長老目揵連、長老阿難,諸天、魔、梵及阿修羅,沙門、婆羅門、閻浮提人,咸生是念:「今日如來、應、正遍知以何因緣於大眾中直說念佛三昧名字,不為一切廣演分別,便從座起而入靜室?」

時不空見心自念言:「諸天、魔、梵悉已集會,世尊今者右脇而 臥,我當微現神通變化。示神通已,種種讚歎宣揚如來大悲功德。 當如其相攝心入定,以是定力變此三千大千世界地平如掌,皆作眾 寶微妙雜色。復列八道七寶諸樹:金多羅樹銀葉花果、銀多羅樹琉 璃花果,餘寶莊嚴亦復如此。一切佛剎,懸繒、幡蓋、妙幢、寶鬘 種種綺飾。優鉢羅花、鉢頭摩花、拘物頭花、分陀利花,如是諸花 布一切處。」

時不空見即如所念現大神通,乃至三千大千世界令諸眾生——天、 龍、夜叉、乾闥婆、阿修羅、緊那羅、摩睺羅伽、人非人等——皆 坐眾寶蓮花之上,花、葉無數,色、香具足,各相知見坐寶蓮花。

時不空見又以定心入此三昧現大神通,復令三千大千世界地大震動,如摩竭國赤圓銅鉢置平石上傾危不定,大地震動亦復如是。若有眾生聞此音聲,覺悟之者皆得快樂。譬如東方不動國土、亦如西方安樂世界,其中眾生歡娛踊悅。

時不空見復以清淨恬寂調和柔潤端正至直無曲甚深定心,如其相貌 示無作神通,於是三千大千世界滿虛空中雨大猛火,無一眾生身心 熱惱。此諸群生大火觸身,覺是相已快樂無比。譬如比丘入火三 昧,身心欣躍;彼亦如是。

時不空見復以定心現無作神通,又令三千大千世界雨天栴檀細末之香,香氣氤氲遍滿大千。若有眾生嗅斯香者,開神適體快樂無極。 譬若釋迦牟尼如來於昔劫中修菩薩行,定光佛所受記莂時,獲不思議無生妙樂;一念之頃,不可計眾亦得如是隨意歡娛。

爾時,阿難在大眾中而作是念:「佛入靜室,是誰神力而現斯變? 為餘聲聞目揵連等?將非彌勒菩薩、越三界菩薩、文殊師利菩薩、 不空見菩薩?為是修習大乘之人乃能示此神變之相。」

爾時,阿難問目連言:「世尊說汝於聲聞中神通變化為最第一,今此通變非爾為耶?」

目連答言:「長老阿難!汝問何緣有是神通?如此變化非我所為。 長老阿難!我所能者,以此三千大千世界內置口中,無一眾生生覺 知相。復次,阿難!我遊梵天,發言音響遍聞大千。如是,阿難! 我在佛前作師子吼,能以須彌內置口中,若經一劫、若過一劫。阿 難!我又住彼炎天,言語、音聲此間世界皆悉聞知。長老阿難!我 能移於天神堂閻置閻浮提而不動搖。」

又告阿難:「我能降伏惡性毒害難陀龍王、優鉢難陀諸龍王等,又能摧靡弊魔波旬。復次,阿難!我往東方過三千大千,還住第三世界之中。彼有大城號曰寶門,凡有六萬億千家屬,令彼家家皆見我身,復能使此諸眾生等聞說無常、苦、空之音。復次,阿難!我實有此諸妙神通未曾示現。我今處在蓮花之座,悉見諸方一一方分,有阿僧祇無數如來皆名釋迦牟尼世尊,處處僧坊右脇而臥。覩佛剎土有如是相,猶我天眼見千世界。若斯相貌,是誰神通?」

#### 時目揵連即說偈言:

「善修最勝, 獲四神足, 今我神通, 無與等者, 唯除自然, 世間之師。 我今住此, 閻浮提界, 動彼東方, 諸佛剎十。 諸婇女等, 帝釋宮殿、 覺此震動, 皆悉驚悚。 我能含叶, 諸佛剎土, 大海、山、川、城邑、聚落。 難陀龍王, 及跋難陀, 如斯族類, 悉能摧伏。 我之神力, 性甚盡害, 今此世間, 我住梵宮, 言語之音, 皆悉聞知。 能住佛前, 吞須彌山, 乃至曠劫。 經百千歲, 住炎世界, 凡有聲響, 使此剎土, 莫不聞之。 我往寶城, 變身普現, 遍在六萬, 億千之家。 我於此生, 未現斯變。 吾今所見, 善哉奇特, 阿難當知, 靈化神通。 及諸眾生, 我自見身, 悉共华此, 寶蓮花上, 歷觀十方, 大威世尊。 我從昔來, 未見斯瑞。 或是菩薩, 不疑如來, 自然神變, 威神之力。」

爾時,長老大目揵連說此神通師子吼時,十千眾生皆得人身,遠塵離垢,獲法眼淨。

爾時,阿難問舍利弗:「如來說汝智慧第一,今此神變將不汝耶?」

答言:「阿難!非我為也。我所能者,二十年中常勤修習毘婆舍那,行、住、坐、臥正念觀察,其心澄寂曾無動亂,分別顯說無量諸法,方便精求不出法界,唯有如來乃能究盡。

「長老阿難!汝頗知不?若我以衣置於大地,目連雖有自在神通, 盡其勢力不能令動。 「長老阿難!汝今當知,我於佛前作師子吼,諸大聲聞,具大神通三果學士,天、人、魔、梵、阿修羅神、沙門、婆羅門、一切閻浮外道異學、尼揵子等來在會中,若能自知身無我者,我今當以三摩跋提決定為之師子吼,說大丈夫、說不思議說,唯除世尊一切知見、彌勒菩薩一生補處、住無生忍菩薩摩訶薩、海德三昧菩薩摩訶薩、善建德三昧菩薩摩訶薩、諸佛現前三昧菩薩摩訶薩。大德聲聞今可問我:『如此身者,何者是我?為可見耶?不可見耶?』又問異學、諸外道等:『汝所計身有神、我者,為是過去?為當現在?』

「長老阿難!我如是相,種種神通變化非一,聲聞、緣覺所不能 知、亦不能見。何者是我?所言我者,為住何處聞如是聲?長老阿 難!吾常精勤修丈夫業、亦復恒習知解之行,我今更有心自在力, 我能伏心,心不伏我。

「長老阿難!吾見自身及以天人坐大蓮花。又見諸方在在處處無數 難思阿僧祇界覩佛世尊坐道樹下,大能天子請轉法輪,吾當隨順聞 如是聲。我眼悉見諸世界中種種繒蓋、幢幡、花鬘,如我即時見此 忍土。長老阿難!我心念言:『為是世尊作此神通?大德聲聞之所 為乎?菩薩往昔曾種善根,今獲如斯變化果報?』」

#### 時舍利弗即說偈言:

「如來不思議, 如是佛功德, 若有善逝眾, 神通廣難思。 及諸佛弟子, 有學、無學眾, 於此剎土中, 我智最第一, 唯除諸菩薩, 信念深固者。 長老阿難陀! 我慧無等雙, 現在及未來, 無能見過者, 除世調御尊, 及趣菩提人。 我恒勤修習, 毘婆舍那行, 滿足二十年, 觀察一切法。

精心方便求, 未曾得邊際, 我所有智慧, 不可得稱量。 我以智慧力, 現在於佛前, 能師子吼說, 唯除異學人, 及行聲聞乘, 求我真實者。 若我現神涌, 飛騰虚空時, 此剎無人見, 吾之所游處, 聲聞亦不親, 唯除世間雄。 蠲別兩足尊, 及以善浙子, 如是諸人等, 知我之所在; 悉非其境界。 外道、眾邪見, 心常自在轉, 禪悅不思議, 若有大士業, 修習深空行。 長老阿難陀! 我現此神誦, 一切聲聞眾, 終不能得知。 奇哉!於今日, 悉覩十方佛, 我在於花座, 明見諸剎土。 建列不思議, 寶幢、妙花香, 一切世界中, 變化不可稱。 長老!我心念: 『不疑是世尊、 威德善逝眾, 種種變化事, 或是不空見, 菩薩之所為。』」

是舍利弗師子吼時,一萬三千諸眾生等遠塵離垢,得法眼淨。

時大迦葉亦在眾中,阿難心念:「是大迦葉威德具足、神通自在, 今者變化將非己耶?」於是阿難問迦葉言:「此之靈奇是大德 乎?」

迦葉答言:「斯神化相非我所為。吾以智力悉能分別顯示一切。長 老阿難!我今住於世尊之前作師子吼,能以三千大千世界其中諸 水:江、河、溪、壑、泉源、池沼、百千萬億無量巨海一切水聚, 吸置口中悉使枯涸,令諸水性、魚、龍之屬都不覺知,亦無惱害。 「長老阿難!汝今當知,我於佛前,諸天、世人、梵、魔、沙門一切眾中師子正說無畏之言,我力能吹須彌山王、大轉輪山、雪山山王,乃至三千大千世界一切諸山,皆成微塵,依此山者都不覺知。長老阿難!我能如是得此自在神通之力。復次,阿難!我又能吹三千大千諸世界中一時皆成猛炎熾火,譬如劫燒將盡之時,一切眾生亦不覺知、又無燒害熱惱之者、又不生念燒剎土想。我神力相具足如是。

「長老阿難!吾住此間,天眼遠矚東方世界億百千剎諸佛國土,始 處處燒,終同一火。我既見已,心生念言:『今當示現神通變 化。』即如其相以三昧力住此世界,過於東方億百千剎,能以一氣 吹彼猛火悉令俱滅。火既滅已,從三昧起,復更發大炎盛之火。

「長老阿難!我神通相及波羅蜜如是滿足。若有人、天生疑不信, 世尊今者右脅而臥,若從定起,汝可往問,唯佛如來能知此耳。」

世尊于時於靜室中遙語阿難:「大德迦葉說師子吼,汝善受持。」

爾時,人、天、阿修羅等皆共歎言:「奇哉,上座!」

摩訶迦葉師子吼時,三億眾生皆得人身,遠塵離垢,得法眼淨;八十五百千那由他諸天亦皆離垢,得法眼淨。

長老不空見菩薩、彌勒菩薩、文殊師利童子菩薩、越三界菩薩,如 是無量諸菩薩等,皆被堅固弘誓之鎧,聞大迦葉師子吼說,以篋盛 花搏如須彌,作此變化供養迦葉,爰及一切聲聞之眾。空中復化作 七寶蓋,一一聲聞各蔭一蓋。

爾時,長老摩訶迦葉見是寶蓋,語阿難言:「此眾決定大乘之行, 作是種種神變之事。 「長老阿難!我坐蓮花,處處方所見佛世尊,不可稱計阿僧祇數。 復覩諸剎七寶嚴淨,雜色間錯,微妙無極。其中眾生更相迎接,悉 見彼國豐樂之相。譬如三十三天之上,貪醉花鬘、愛著瓔珞,諸天 身色如月光明。於虛空中有化寶蓋,一一眾生各蔭一蓋,亦如我今 等無有異。處處佛剎,無量菩薩從兜率天降神母胎。

「長老阿難!我今所見奇哉達行及師子吼,此實非凡之所能為,如 是瑞相現大神通。」

#### 爾時,長老摩訶迦葉即於眾中而說偈言:

「阿難!汝當知, 我以念定力, 現在於佛前, 以是三千界, 此佛之剎土, 一切諸巨海, 大小江、河等, 無量種水聚, 我以神涌故, 悉能吸彼水, 置之於口中, 雖皆令枯涸, 眾生無傷損, 不惱於水性。 此剎眾須彌、 黑山、諸山等, 我住神奇力, 悉能吹散之。 我以聰慧智, 又用神通化, 今此佛剎十, 一切成烟焰, 亦無畏懼想。 眾生不熱惱、 我住於此界, 見彼東方國, 阿僧祇剎十, 悉為火所焚, 奇哉!難思力, 令彼火即滅。 既見諸神力, 如此自在行, 悉無有毀損。 令無數佛剎, 我處蓮華座, 見此諸剎土, 種種皆端妙, 殊傑尠儔匹。 又覩兜率天, 菩薩隆神時。 心達自在者, 不疑諸善逝, 為是諸聲聞、 不空見菩薩、 為彌勒大十, 而有斯瑞相?」

爾時,阿難心生念言:「是富樓那彌多羅尼子,說法人中最為第一,今在此會,有大神德,決定諸法,得到彼岸。如是神通將非己耶?我今當問。」即便白言:「唯,富樓那!如是瑞相大德為平?」

答言:「非也。長老阿難!我之神通,調伏利益諸眾生故,力能示 現以手掌摩此之三千大千世界,不令眾生有傷損者。若有眾生樂神 通力,示現翻覆大千世界。譬如勇健巨力丈夫以指捻取迦利沙槃, 上下拋擲不以為難;我以右手轉側三千大千世界亦復如是,無一眾 生有惱害者。長老阿難!若此三千大千水界,我以手指一點取之悉 著口中,亦無眾生生知覺想。我於佛前作此神通。

「長老阿難!於夜初分,我以清淨勝妙天眼於此三千大千世界歷觀 諸方何者眾生於法疑滯,當為除斷。即以天眼觀諸方時,處處見有 四方世界,其土廣大,無數眾生迷於正法。

「長老阿難!我心念言: 『不起此坐,往破彼疑。』即如三昧清淨 寂定調和柔潤正直之心,斷彼眾生於法疑惑。我於會中演說法時, 一一眾生謂在其前。長老阿難!夜既初分,四方各有無數千眾悉得 安住於聖法中、三萬眾生皆受禁戒、六萬眾生歸依三寶。從三昧 起,我如是相神通變化,悉能斷除眾生疑惑。

「長老阿難!我能安住於此世界,以淨天眼見於北方除怨國界—— 從此佛土過三萬剎——有一眾生於法疑惑。是世界中佛般涅槃,應 聲聞法之所化度。我心念言:『當斷其惑。』不往彼處,即於此坐 遙令眾生自然調順。

「長老阿難!我今即時如定心相入此三昧,無數眾生作法光明。如 是相貌,我之聲聞諸波羅蜜皆已滿足。若使有人於此眾中脫生疑 網,不信受者,如來起時自可往問。」 即於是時,佛神力故,虛空之中出大音聲:「阿難!汝今如是受持如富樓那師子正說。」

時諸人、天、阿修羅等皆歎:「奇哉!實為希有。聲聞神通相貌如此, 豈況如來真境界乎?」

時諸人天作此讚已,富樓那彌多羅尼子即於眾中而說偈言:

「我諸漏已盡, 決定到彼岸, 永脫一切生, 為世所歸依。 既入於眾數, 異佛神涌力, 天、地、山、河等, 右手能翻覆, 不令一眾生, 而有傷損者。 長老!我神通, 勢力實如此。 若有三千界, 大千之水聚, 於此佛土中, 或見、或不見, 悉點內口中, 我能以一指, 不使諸眾生, 而有覺知想。 我於初夜時, 天眼觀諸方: 『何者眾牛等, 於法有疑惑, 當住神通力, 悉為除斷之。』 我見一眾生, 於法墮疑網, 貪慕求法者, 若有淳善心, 吾不起此坐, 悉除彼癡惑。 四方千億眾, 我以淨眼施, 能 令彼牛信, 使發菩提心。 時有三萬人, 從我受禁戒; 六萬諸眾生, 歸依於如來, 其心得寂靜, 安住正法中。 我於初夜時, 示現妙神通, 一念於此坐, 歷觀東北方, 周觀過千剎, 正降怨世界, 心疑於諸法。 彼有一眾生, 我住此佛剎, 彼人疑於法, 欲令見正路, 今決其迷惑。 智力實如斯; 長老!我神通、 唯佛能哀愍, 一切諸世間。

此處人不信,可往問世尊。 我今坐蓮花,見彼佛涅槃, 處處方剎土,閣維如來身, 及見佛殊特。為是誰神力? 又如我所見,諸佛般涅槃, 廣遠甚弘雅,不可得思議。 為是佛所作?聲聞之人耶?」

爾時,阿難心生念言:「此羅睺羅是佛之子,有大威德,神通自在,今亦在此大眾之中。如是變化將非己耶?」阿難即便問羅睺羅:「汝於戒學得到彼岸,此之神通汝所為乎?」

羅睺答言:「非我所作。長老阿難!我如是相,種種百千威德、神力隨意自在,為佛之子,或隱、或顯,未曾憶念,不甞在前、亦未示現。長老阿難!我能以此三千大千世界之中,百億四天下、百億日月、百億大海、百億須彌、百億大小轉輪之山,如是廣大諸餘山等,以四神足置一毛端,不令眾生有傷損者,於四天下不相逼迫,彼此去來亦無妨礙。吾之神通自在如此。

「長老阿難!我能以此三千大千一切水界:大海、江、河、溪、 澗、池、沼,以一毛孔[口\*束]置口中,渟流派別本相分明,其中 眾生適性不改,水之盈竭亦不覺知。

「長老阿難!我住此土,如定心相入此三昧,見東北方難生如來。 我在此剎白淨王所,撮取一把栴檀末香,供養彼剎一切諸佛,其香 芬烈乃至十方。難生世尊化作臺觀——高十由延,七寶所成——即 在此處燒眾天香。復於臺上化作寶蓋,其蓋足高億千由延,縱廣正 等百千由延。彼世界中一切眾生,皆共幻作栴檀樓閣,其樓上高百 千由延,縱廣正等五千由延。如是無量在寶臺中,各各莊嚴不相障 礙。 「長老阿難!瑞相如是,我於聲聞具波羅蜜。或有生疑、不能信者,世尊若起,自可往問,我師子吼如來證知。」

#### 時羅睺羅即說偈言:

「長老阿難陀! 我以大千界, 百億四天下, 及無數佛剎, 如是諸剎土, 悉入一毛孔。 我神涌如此, 無所譬類者。 世界甚廣大, 不滿一毛孔, 悉不見妨礙。 各安去來業, 我能如是示, 神力不虚行。 須彌寶山王, 及大小轉輪, 皆入一毛孔, 復有諸餘山, 以我神變力, 彼此不相礙。 長老!我如是, 示此神奇相, 悉見入毛孔, 而身不疲倦。 我又神足力, 以此大千界, 江、河、大海水, 吸内毛孔中, 而此佛剎十, 一切大水聚, 當入毛孔時, 區別不渾亂。 我在善逝前, 示現於神通, 若疑不信者, 往問普眼尊。 見十方菩薩, 我處蓮華坐, 頭、目及妻子, 施以求菩提。 奇哉!我所見, 實生希有心, 不疑於世尊, 所作之神變。 為諸大威德, 善逝聲聞眾? 為是不空見、 彌勒菩薩等?」

長老羅睺師子吼時,八十七億百千那由他諸天人等得法眼淨,是諸 天等見法到法、選擇眾法、明了於法。如是相貌當設供養,以天栴 檀細末之香,以用奉散羅睺羅上:「奇哉,佛子!離垢清淨,住大 乘行深妙之法,能演師子殊妙之音。善哉,羅睺!未來之世當師子 吼,猶若今日。」 爾時,阿難心生念言:「此須菩提,阿蘭若行最為第一而無等雙。今是大德在此會中,世尊常說此須菩提能作種種無量神通。」阿難即問須菩提言:「如是變化將非汝耶?」

答言:「長老!非我所為。我能常樂不捨閑處,如彼定心入此三昧,以是三千大千世界置一毛端極微之分,周迴旋轉如陶家輪,其中眾生無覺知者。

「長老阿難!我於佛前能師子吼,正說無畏。吾以一氣吹此三千大 千世界悉令燒盡,不使眾生有熱惱想。我曾示現如此神變。能在佛 前說師子吼,以此大千世界眾生置一指端,上昇虛空,彼此寂然無 諸音聲,不相觸礙及覺知者。

「長老阿難!我之所能,如彼定心入此三昧,以清淨眼一時矚對八 方上下六萬諸佛。一一方中又覩六萬百千世界諸佛如來,彼處次第 見無前後。長老阿難!我如定心、如其相貌作神通行,住此閻浮須 彌山頂釋提桓因所居天宮,撮取一把栴檀末香,俱時遍散十方諸 佛,紛綸彌漫以用供養。我住此剎見彼眾生恭敬、尊重、讚歎如 來,彼土眾生悉知我是釋迦如來、應、正遍知聲聞之中空閑第一。

「長老阿難!我之神通如是相貌,究竟彼岸。若此人天於我生疑、 有不信者,往問世尊,如來自當知此三昧。」

時佛神力,於虛空中震大音聲告阿難言:「如須菩提正說師子無畏 之音,汝可受持。」

時諸人、天、梵、魔、沙門、一切閻浮阿修羅等,既得法利,生希有心,驚愕毛竪,歎言:「奇哉!聲聞神變乃能如此,豈況如來種種神力?無數三昧真實者哉。」

時須菩提知諸人天已得法利,即說偈言:

「世間師稱我, 阿蘭若最勝, 安住禪解脫, 現無量神力。 長老阿難陀! 我能以大地, 置於一毛端, 旋之而不危; 亦如陶家輪, 雖轉不傾側。 又於世尊前, 破碎一切地, 及以諸山岳, 無有損傷者。 我住神足力, 威勢皆如此。 舉剎及眾生, 我能以手堂, 安置虚空中, 從上次第下, 亦無一眾生, 驚疑怖畏者。 我入三昧時, 見彼東方佛, 南方亦復然; 其數有六萬; 我復見西方, 六萬世間尊; 北方及上、下, 斯數亦如是。 及覩眾樓閣, 妙絕無等倫, 供養諸世尊。 以少栴檀末, 我實有若斯, 無垢神通行, 及諸示現等, 能大師子吼, 不能深信者, 可往問如來。 我無眾生想, 亦無無生想, 無佛、無法想, 一切無相故。」◎

#### ◎菩薩念佛三昧經彌勒神通品第四

爾時,彌勒菩薩摩訶薩心生念言:「是諸聲聞有大威德、無數神通,各各自說大師子吼。我當於此人、天、魔、梵、沙門、婆羅門、聲聞、菩薩大眾之前,微現神變。」即於晨朝語阿難言:「大德!今可正衣持鉢,共往佛所。」到已,頭面禮如來足,白言:「世尊!我今欲入王舍城中分衛乞食。」

世尊知時,默然而許。

於是,彌勒告阿難曰:「我向心念:『初受食處,於此眾生先當令 發無上道心,然後乃取此人飯食。』大德阿難!我已發意,今便共 行,入城乞食,詣大長者婆羅門家。」到已,持鉢默然而住。

長者見已,即便白言:「善來,比丘!久望慈顧,願聖今者受我蔬食。」

彌勒菩薩語長者言:「我今未能受爾供養,汝若能種無上菩提善根 因緣,當受汝食。」

是時長者即白彌勒:「若能以我所施之食供養恒沙諸佛世尊,然後乃當發菩提心,決定大乘真實之行。所以者何?我於先佛種善根故。」

時阿逸多答長者言:「若能安住如是誓願,我當以食供養恒沙諸佛 世尊,皆使周遍。」

長者復言:「唯然,仁者!我當真實發大誓願,願以此食供養恒沙 諸佛世尊,悉令周普。」如是三白。

爾時,彌勒語長者言:「汝今便可時施所供,當以獻上恒沙諸佛。」

爾時,長者即以名饍奉授彌勒。彌勒受已,於長者前一念之須忽然往彼恒沙佛所供養周遍。奉設既畢,還長者家。

長者見是神通之相,歎言:「希有。」踊悅無量:「我今復應種諸 善根,奉施甘果、餚饍美味、嚴飾床座,皆悉豐足。」

長者復持一切珍寶、香花、花鬘、金衣、素疊,俱共往詣至如來 所。到已,頭面敬禮佛足,於如來前發菩提心。又立大願而作誓 言:「若有眾生修菩提行,聞我施食善根因緣,一切當得無上菩 提。若吾斯願誠諦不虛,必當獲得阿耨多羅三藐三菩提。時無數菩 薩及諸聲聞、一切大眾咸來集者,此之三千大千世界即時應當六種 震動。」發是誓已,大千剎土便大起踊,具十八相。

是時長者語阿難言:「大德!今者現為我證;若不信者,問於世尊,神通、相貌具足如是。我今未得無上菩提,自在變化已能如此。」

彌勒菩薩語阿難言:「我憶過去阿僧祇劫造光佛所,修得少分諸佛如來所行三昧。獲是定已,見於東方無數諸佛各住彼剎,以三昧力於無量劫方便度脫不可計眾得阿僧祇神通變化、住於阿耨多羅三藐三菩提道,猶今王舍婆羅門也。大德阿難!我於往昔蓮華上佛、應、正遍知所,以一神通化度三萬億那由他百千眾生住無上道。大德阿難!我於往昔最高如來、應、正遍所得普世定,度脫六萬欲界諸天發菩提心。我具如是神通相貌。」

#### 時阿逸多即說偈言:

「正服持應器, 往詣能仁尊, 頭面禮佛足, 白言:『行乞食。』 佛即許其去: 『當廣利眾生, 吾般涅槃後, 汝應次作佛, 名譽及功德, 一切皆具足。』 我時心念言: 『今日行分衛, 若初施食者, 令住三菩提。』 時彼大長者, 見我行乞食, 即便從坐起, 恭敬意無量: 『善來,阿逸多! 希現乃如此。 今來一何晚? 唯願前坐食, 大士法難思, 當設尠微饍。』 『長者!汝若能, 為利諸人天, 發無上菩提, 我當受汝食。』 『即時若能爾, 我當立誓願。 阿逸汝即時, 能以所施食, 奉獻恒沙佛, 悉令周遍者, 然後我當發, 無上菩提心。』

『長者!若定能, 作此真實誓, 願得大果報。 施於恒沙佛, 建立必不虚。』 我今保此誓, 持鉢受食已, 普供人中尊, 利益諸眾生。 修行菩提道, 阿難!是長者, 見我神捅事, 心敬大歡喜, 歎仰未曾有, 其心即安住, 無上堅固願。 復施珍果饍、 嚴飾妙香花、 種種眾妙供。 素疊及名寶, 共我詣如來, 深發菩提願, 更作廣大願。 長者發誓已, 不可得思議, 其願無限量, 眾生若聞者, 此剎成佛道。 造光如來處, 得此微妙定, 諸佛之所說, 施不思議樂。 獲得此三昧, 造光世尊所, 十方諸如來。 爾時我悉覩, 若得大威力, 乃能見是事, 安住此三昧, 示現諸神涌。 百阿僧祇劫, 修習種種行, 利益諸眾生, 未曾有休息。 蓮花上佛所, 得是三昧已, 七十千眾生, 我以種種化, 皆悉今得修, 無上菩提道。 最高如來所, 專修諸梵行, 得微妙三昧, 施不思議樂。 最高善逝處, 又得普世定, 爾時復安住, 月出三摩提。 迦葉如來所, 得是深三昧。 大德!我如此, 示現神變時, 攝取於往昔, 百千世神涌。 若住此威勢, 能作種種化, 我亦見諸佛, 現作如此行。 若有欲樂見, 諸佛世之師, 法輪深妙音, 復有欲願聞, 亦樂拔世間, 一切牛死苦, 清淨三昧王。」 當勤受持此,

爾時,諸天、世人、魔、梵、一切閻浮及阿修羅,聞阿逸多師子吼已,生希仰心,歎未曾有。

### 菩薩念佛三昧經讚佛音聲辯才品第五之一

爾時,不空見菩薩摩訶薩即從三昧庠序而起。時諸人、天、龍、神、魔、梵、沙門、婆羅門、阿修羅等,一切世間皆悉讚言:「異哉!至法。」

時不空見告阿難言:「妙哉!諸佛實為希有。世尊大悲無不具足,故名如來、應、正遍知,獲得無上菩提之道,知一切法無生、無行,無得、無失。波羅奈國仙人鹿苑三轉十二行無上法輪,沙門、婆羅門、諸天、魔、梵,一切世間無能轉者,所謂是苦、是苦集、是苦滅、是苦滅道。八聖道分無數章句、無量諸相、無限行處,如此義味讚誦解說、分別敷拆,無不具足。」

時不空見復告阿難:「善哉!諸佛大悲滿足,故名如來、應、正遍知,得是無上菩提之道。今此大會諸聲聞眾,未曾聞法當令聞之、 先所未說今當為說、不思議法當思議說、所未得法今當使得、未學 之法令得修習、無相之法作有相說、略說少法啟悟弘多。今告此眾 諸阿羅漢,畢竟作證無著真人,永得解脫無始生死。

「阿難當知,譬如有人以一把<u>数</u>投恒河中,謂能以此斷彼駛流。此 人所作為難不耶?」

阿難答言:「如是,甚難。」

時不空見語阿難言:「諸佛、如來、應、正遍知得無上道,為諸聲 聞說未聞法,倍難於彼。復次,阿難!譬如有人生無口、舌,聲震 恒沙一切世界。此為難不?」

阿難答曰:「如是,甚難。」

不空見言:「諸佛、如來、應、正遍知得無上道,為諸聲聞不思議 法作思議說,尤難於彼。復次,阿難!譬如有人指虛空中示種種 色。為難不耶?」

阿難答曰:「如是,實難。」

不空見言:「諸佛、如來、應、正遍知得無上道,令諸聲聞所未得 法今當令得,彌難於彼。復次,阿難!譬如有人無有手、足及呪術 力,擔須彌山,或欲履水、或持浮木渡於大海。此為難不?」

阿難答曰:「如是,甚難。」

不空見言:「諸佛、如來、應、正遍知得無上道,為諸聲聞以無相 法作有相說、以未學法作有學說,又難於彼。」

### 時不空見即說偈言:

「諸佛不思議, 深行大慈悲, 常施法光明, 相繼恒不絕。 無數那由他, 億劫甚難見, 無比最勝尊, 未聞當令聞。 有為緣起轉, 無實恒虛偽, 畢命常無生, 一切法空故。 諸佛所行慈, 不可得思議。 佛說所未說, 如此難見法, 利益諸人天, 普及於一切。 諸如來深解, 不可思議法, 能為聲聞眾, 說有思議法; 能作有相說。 佛說無相法, 外道癡所迷, 不識 生死源, 如來既知已, 皆悉令摧伏。 住十力敷演, 未得法令得, 世尊直實說, 利益諸人天。 欲以一把戮, 斷截恒河水, 長老!此雖難, 未足稱為難; 世依說無生, 斯難過於彼。

若人無口、舌, 聲震遍諸剎, 雖復能如此, 不足以為難; 未學令得學, 是則最甚難。 若人指空中, 言有種種色, 言有種種色, 豈足稱甚難。 若人無手、 我說最為難。 若人無手、足 擔負須彌山, 欲渡於大海, 未足以為難; 無相說有相, 此則倍難彼。」◎

菩薩念佛三昧經卷第二

宋天竺三藏功德直譯

### 讚佛音聲辯才品第五之二

◎時不空見復告阿難:「諸佛世尊希有殊特,於阿僧祇無量諸法決 定究竟,到於彼岸,故名如來、應、正遍知。戒、定、慧、解脫、 知見等眾一切法相無取著行,建勝寶幢出一大音。若有眾生樂聞施 惠得解脫者,即生念言:『如來為我說施利益。』若有眾生樂聞禁 戒得解脫者,即生念言:『如來為我說戒饒益。』若有眾生樂聞三 昧得解脫者,即生念言:『如來為我說於三昧。』若有眾生樂聞智 慧得解脫者,即生念言:『如來今者為我說智。』若有眾生樂聞解 脫得濟度者,即生念言:『如來今日為說解脫。』若有眾生樂聞解 脫知見之者,即生念言:『如來為我說於知見。』若有眾生樂於生 天得解脫者,即生念言:『如來為我說於生天。』若有眾生樂聞無 常得解脫者,即生念言:『如來為我說於無常。』若有眾生樂聞說 苦而得解脫,即生念言:『如來今者為我說苦。』若有眾生樂聞無 我得解脫者,即生念言:『如來今者為說無我。』若有眾生樂聞寂 滅得解脫者,即生念言:『如來為我說寂滅法。』若有眾生樂聞不 淨得解脫者,即生念言:『如來為我說不淨法。』若諸眾生樂聞無 上道得解脫者,即生念言:『如來今者為我讚歎諸佛功德、說大乘 法。』無一眾生聞如來說如此法已不解脫者。」

## 時不空見即說偈言:

「此聞調御師,於眾中演說, 戒、定、慧解脫、解脫知見等, 如是一切法,宣說皆作佛。 樂聞說施、戒,而得解脫者, 各聞世間依,歎施、戒功德; 樂聞說定、智, 解脫功德者, 演不思議音; 即聞佛、世尊, 樂生天解脫, 牟尼即為演; 天中天今說; 樂聞智慧者, 樂聞無常、苦、 無我、不淨說、 寂滅等諸音, 而得解脫者, 不可思議聲; 即時便得聞, 若有欲樂聞, 辟支佛功德, 善逝今便為, 說斯緣覺乘, 聞佛諸功德, 如此解脫乘。 眾生求菩提, 世尊說法已, 如此一切音, 不可得思議。 佛所官諸法, 利益於世間, 清淨之妙聲, 既蒙解種種, 即時悉皆發, 無上菩提心。」

時不空見復告阿難:「諸佛世尊殊特希有,成滿一切無數善根,故名如來、應、正遍知。親近供養無量諸佛,布施調伏、一心寂定,今得無上菩提之道,具足成就無數辯才。釋迦如來得無量辯、最無上辯、無能答辯、無取著辯、勝解脫辯、無罣礙辯、成就性辯、成教化辯、施無熱辯、有無問辯、豫知之辯、若有相辯、若無相辯、靜默然辯、能除恚辯、種種章句及名字辯、甚深句字及宣示辯、宣示甚深調柔之辯、無量譬辯、無問答辯、具足定辯、具廣大辯、具難思議辯、具開敷辯、具清淨辯、具無毀辯、具足聰慧無毀損辯、具心無著辯、具心無吝辯、具足無失字句之辯、具無盜辯、具無妄辯、具足開發說法意辯、具足無失字句之辯、具無盜辯、具無妄辯、具足開發說法意辯、具足說法開發煩惱生淨心辯、具足親近說章句辯、具說過去辯、具足說法開發煩惱生淨心辯、具足親近說章句辯、具說過去辯、具說未來辯、具說現在辯、具說希有辯、具足無生勝妙智辯、具足一切大眾熹辯。」

## 時不空見即說偈言:

「昔已曾至心, 供養無量佛, 是以人中尊, 今得無上道。 不思議善根, 阿僧祇諸辯,

無礙開發辯, 佛得此眾辯; 無上解脫辯、 成就教化辯、 廣盲諸相辯、 有問無問辯; 種種說甚深, 隨順譬類辯, 清淨難思音、 具足妙說辯, 淳淨義成就、 決定 眾相辩, 無卑無下辯。 不思及不退、 善哉!明慧人, 無著無毀辯, 無妄攝樂辯, 不失字章句、 能斷煩惱心、 不忘十力辯, 最上及親沂、 盲說三世辯, 若聖與不聖, 如此隨順辯, 無猿、無牛等、 近聽、遠聞辯, 說善浙功德、 音聲清暢辯。 若人以一毛, 點取大海水, 可知其數量, 能令乾竭盡; 無有知諸佛, 如來大勝辯。 或有量虚空, 能知其邊際; 能秤須彌山, 亦可識斤兩; 如來智辯力, 無能摧伏者, 雖復歷劫數, 不測如斯辯。」

時不空見復告阿難:「長老當知,諸佛世尊大梵音聲、師子音聲、雄猛之聲、龍王音聲、弦聲歌聲、柔軟好聲、大小雷聲、不思議聲、無量妙聲、無邊勝聲、滿足音聲、不退之聲、迦陵頻伽聲、清淨歡喜聲、如來分別聲、如來識了聲、如來甚深聲、如來無毀聲、如來不却聲、如來清徹聲、無衰無損聲、如來美妙聲、如來最美聲、如來無不美聲。如來廣具足一切功德聲,是處說如來、應、正遍知以一音聲一世界其中眾生皆悉樂聞,又以一音令二世界其中眾生亦願樂聞,如是一音乃至百千萬億那由他無邊世界其中眾生樂聞亦然。彼處眾生聞如來聲,如是解了、如是識知,皆言:『如來為我說法。』

「如是,阿難!諸佛如來不思議音利益之聲。譬如日輪照閻浮提, 有目眾生皆蒙慧利。如是,如來、應、正遍知音聲法輪清淨微妙, 濟拔一切亦復如是。

「長老阿難!譬如初春十五日夜,月輪圓滿,清明澄照,無諸霞翳。閻浮提人皆出遊觀,得恣歡娛,緣月盛故。如是,如來、應、 正遍知音聲法輪清淨微妙,眾生所以得利益者,緣遇如來法光明 故。

「長老阿難!譬如眾川、江河、溪壑,巨細諸水悉入大海,皆成一味,而此一味具足眾味。亦有無量諸妙珍寶,人及非人雖貪此寶, 大海深廣難可得渡。如是,如來、應、正遍知清淨音聲法輪難解, 令諸眾生得法寶利、無量安樂亦復如是。

「長老阿難!譬如大地,開發種子、生長萬物,利益眾生無不豐 溢,聚落、城邑、帝王京畿,一切境界皆依此地。如是,如來、 應、正遍知音聲法輪清淨微妙,拯救一切無量眾生,悉令歡樂亦復 如是。

「長老阿難!譬如虛空,世間去來無所妨礙,而此虛空能安樂物。如是,如來、應、正遍知音聲法輪清淨微妙,饒益一切亦復如是。

「長老阿難!譬如三十三天上波利質多、拘毘羅樹,花葉芬敷,諸 天遊觀莫不歡適。如是,如來音聲法輪清淨敷演一切法聲,甘露利 樂亦復如是。」

## 時不空見即說偈言:

「世尊梵王音, 閻浮提第一, 師子雄猛聲, 及以大龍聲, 絃竹調軟音, 十方不思議。 鍾鼓雷吼聲, 無邊普震聲,

佛十滿足聲、 未曾衰減聲、 迦陵頻<mark>伽</mark>聲、 愛順歡喜聲、 聖喜無濁聲、 教與無教聲、 無譏毀謗聲。 其深無為聲、 句字之音聲, 難見善分別, 無諸衰損聲、 美妙普遍聲、 無有繋縛聲、 及無遺忘聲。 一切功德聲, 世間依所說, 遍滿一切界。 能以一音聲, 歡喜悉樂聞, 調伏群萌類, 皆云:『今如來, 獨為我說法。』 如來以一音, 乃至恒河沙, 無量世界中, 眾生皆樂聞。 譬如出暉明, 照耀一切物; 世尊如是音, 為眾演說法。 初春十五日, 滿月光澄淨, 遍照閻浮提, 如此明月輪, 皆令得歡樂, 利益亦無邊; 覩者無不欣。 世依猶斯月, 清淨妙音聲, 能為利一切, 閻浮提最上, 不可得思議。 如大海無邊, 眾寶之所出, 深廣難可濟, 饒益一切眾; 大勝佛如是, 最上無過者。 有教、無教等, 音聲甚難解, 能施一切樂。 清淨無所毀, 於此三千剎, 安置一切眾, 佛音聲如是, 利物難思議。 虚空無罣礙, 能 诵 諸飛行; **廣潤一切眾。** 世尊音如是, 如天香花、樹, 敷榮善利益; 具足益世間。 如來諸音聲, 說佛聲功德, 我於一劫中, 雖復歷百劫, 不測其始終; 諸佛亦如是, 不可思議音。 十方諸眾生, 異口無邊辯, 說佛聲功德, 不能盡其際; 世間依如是, 不可思議音。

若有諸水、陸, 一切眾生等, 假令悉得佛, 不測聲涯底; 諸善遊如是, 不可思議音。 如此調御師, 音聲無與匹, 若能隨順念, 終不墮惡趣。 若有諸菩薩, 聞佛具足音。 當得佛法王, 不思議音聲。」

時四天王、釋提桓因、焰摩天子、兜率天子、自在天子,及大自在并與其子名曰商主,大梵天王、淨居諸天,復有大力威德諸天、欲色二界諸天子等,聞不空見菩薩所說佛聲功德,歎未曾有,以天栴檀細末之香散不空見菩薩摩訶薩乃至十方供養已畢。時有六十億百千那由他欲色諸天,聞此音聲皆種無上菩提善根;五千比丘亦發無上菩提之心,被弘誓鎧;七百千萬諸比丘尼發無上心及弘誓願;百千優婆塞從花座起,詣不空見大菩薩所;復有二億百千那由他諸女人等,各脫身上珠寶、瓔珞奉不空見菩薩摩訶薩,亦發無上菩提大願。

## 菩薩念佛三昧經讚如來功德品第六

爾時,不空見菩薩摩訶薩告阿難言:「奇哉!希有。諸佛如來具足深知生死往來,憶識生處、親戚、眷屬,善知煩惱、諸惡過患。具足相好,具足行捨、大捨意念,戒、定、智慧、解脫、解脫知見,具足六通,到於彼岸。若慈大慈、若悲大悲、若喜大喜、若捨大捨,最勝無倫,到於彼岸。威儀、神通、一切諸法最勝無礙,到於彼岸。若處非處示導諸方,利益最勝,到於彼岸。及舍摩他、毘婆舍那最勝無比,到於彼岸。一切禪定、解脫、三昧、三摩跋提最勝無上,亦到彼岸。無貪、無瞋、無癡,無慢、無惛、無過、無有慢慢,無惑、無恚,度脫五道、四毘舍羅(此或言施戒法,世間皆無慳義),眾生善根、業報論議最勝無等,到於彼岸。一切眾生戒聚不斷、不漏、不濁,無雜、無言,慧明清淨,勇猛殊勝。沙門、婆羅門、

人、天、魔、梵、一切世間之大法主,無一眾生能測如來戒定之分如毛髮許,更無有人能超過者。長老當知,應如是觀:我能究盡虚空邊際,不能度量諸佛世尊戒、定、智慧、解脫、知見。所以者何?以無邊故。如來戒、定、神通、諸法,非是淺識之所思議,深不可測,無能窮者。」

### 時不空見即說傷言:

「世尊生死盡, 住胎難思議, 法性以為母, 不可得為比。 具足善功德, 世間無能及, 身相三十二、 八十種妙好。 世間 日思議, 攝取諸善業, 妙哉!人中尊, 具足善紹出。 若捨及大捨, 煩惱心解脫, 方便諸勝業, 滿足無與等。 具足戒、定、智、 解脫、知見分, 諸佛法無邊, 六通到彼岸。 如來具慈、悲、 喜、捨諸行處, 能解眾生縛, 拔濟種種苦。 諸佛深智聚, 不可得思議, 威儀無等比, 神捅到彼岸。 無諸煩惱行, 善解於直諦, 若處及非處, 利益悉具足。 定、解脫如此, 不可得思議, 善解舍摩他、 毘婆舍那等。 已到世所無, 永離諸惡心, 善學定、解脫, 除滅愚癡患。 淨戒不斷絕, 不漏亦不濁, 善學戒無失, 勇健明哲人。 無有一眾生, 而懷疑謗心, 沙門、婆羅門、 人、天及魔、梵, 心信不懷疑, 常善學清淨。 四方廣大相, 我能知虚空, 不能測勇猛, 無上清淨戒; 海水 令枯涸, 能以一氣吹, 清淨法明戒; 不能測如來,

能以一氣吹, 須彌令碎盡, 大小轉輪山, 亦復成粉塵, 不能測如來, 淨戒之崖際。 雖復歷劫數, 不能得其量。」

時不空見菩薩心生念言:「善哉!如來、應、正遍知願屈威神降臨 眾會,我今欲為諸菩薩等請問如來念佛三昧。世尊先於大眾之中雖 說其名,竟不敷演便入靜室右脅而臥。」

爾時,世尊即知其念。佛神力故,令此三千大千世界六種震動、具十八變。亦如前說,放大光明普照此土娑婆世界,日、月、星宿、欲界諸天、無邊恒沙眾梵天等,其明隱蔽悉不復現,唯佛神光顯耀殊特。愍眾生故,即從臥起,齊整衣服往大會所。

時諸世間人、天、沙門、婆羅門等及阿修羅,各見如來殊勝光明從花座起,往詣佛所,恭敬合掌,却住一面。

時不空見遙覩佛來容色端嚴,威儀庠序,仰瞻相好無不具足。見已,即告長老阿難:「世尊今從靜室而來,必當敷演顯發最勝第一義諦,無虛妄說、巧妙宣說、無分別說。善能思量,不起惡業,身業無毀、口業無譏、意業無失,三業皆淨。戒、定、智慧及以解脫、解脫知見,亦悉具足;無上方便神通利益、不思議辯殊特具足;善知生死無能過者,住胎清淨、母族豪勝、眾善功德最為具足;不可思議相好具足;往昔因緣及意具足;煩惱解脫,心得具足;若捨大捨,超出具足;五識無取,離染具足;五分法身清淨具足。究竟已到六通諸法及法性相,皆到彼岸;毘婆舍那及舍摩他、根、力、覺、道,到於彼岸;慈、悲、喜、捨不可思議,深心慚愧到於彼岸。已至諸法自在彼岸,過去、未來、現在諸法皆悉知見,不著、不退。能知一切過去身業,亦知轉變,到於彼岸;口、意二業亦復如是。

「長老阿難!如來世尊一念能知一切眾生心行善惡,莫不了達。」

時不空見告阿難言:「譬如大海深廣難渡;諸佛戒品淵曠亦然。譬 如須彌永不可傾;如來定品難動亦然。

「長老阿難!譬如虛空清淨容納,無有齊限;諸佛三昧攝取無邊清 淨智品,又攝一切眾生淨心。

「長老阿難!譬如日光悉能臨照無量色像;如來法光無幽不燭。

「長老阿難!譬如大火焚燒山野、一切眾物;如來法火能燒眾生無 量煩惱,永得清淨。

「長老阿難!譬如涌泉,盈流出外成於淵池,能洗萬物皆令潔淨; 如來法水亦除眾生一切結累,常得獲安。

「長老阿難!譬如醫王善療眾生種種疾患;如來法藥能消眾生生死 重病,皆使永除。

「長老阿難!譬如時雨潤益卉木,無不增長;如來法雨亦潤一切枯 槁眾牛。

「長老阿難!如師子吼能使眾獸皆令慴伏;如來法音能壞眾生計我 見者,永得遠離。

「長老阿難!譬如大船能濟彼岸;如來法船渡諸眾生四流彼岸。

「長老阿難!如優曇花希有難見;如來出世亦復難遇。

「長老阿難!譬如波梨質、多羅樹,其花敷榮,馨香殊特;佛大人 相明發亦然。

「長老阿難!譬如父母能育諸子;如來亦爾,善利眾生。

「長老阿難!若人說言: 『如來出世,無邊正說。』是名真說。若 人說言: 『如來出世說不思辯。』是名正說。

「長老阿難!略說如來有無邊辯、無取著辯、無罣礙辯、勝解脫辯、成就妙辯、常隨順辯、漸親近辯、有無問辯、微妙淨辯、最上辯、慈大慈辯、悲大悲辯、喜大喜辯、捨大捨辯、佛出世辯、又利益辯。長老阿難!若人說言:『如來出世具足利益一切眾生。』是名正說。長老阿難!若人說言:『眾生無安、無救、無歸、無趣、無主,如來出世能作安、救,及歸、趣、主。』是名正說。

「長老阿難!我若一劫或至百劫,宣說諸佛世尊功德、智慧、辯 才,億不及一;又,於無量一切諸劫宣述如來、應、正遍知功德、 辯才,不能窮究。

「長老阿難!譬如有人羸老攣癖,住他人所,語彼人言:『奇哉, 丈夫!我雖如此,能以一毛點取一切無量諸水內置口中,悉令枯 竭。』此人既無神通、呪術,能為斯事為可信不?」

阿難答言:「此為難信。」

不空見言:「實不能也,徒空言耳。如是,阿難!我說諸佛功德、 辯才不能窮極,猶如彼人無竭水理。

「長老阿難!假使我於億百千那由他劫,不能宣說諸佛功德、智 慧、辯才一毛之分;唯佛與佛乃能盡耳。

「長老阿難!如此大地容受眾生,乃至有足及以無足、四足、多足,有色、無色,有想、無想、非有想、非無想,若此世界、若他世界,若千世界、百千世界、無量無邊一切世界,其中眾生當得成佛。是諸世尊於億百千那由他劫,說佛功德不能窮盡一毛之分。如是功德,無不具足。」

### 時不空見而說偈言:

「長老阿難陀! 法王從彼來, 一切諸世眾, 無不興供養。 勝炎光明主, 功德皆無數, 最勝利益說、 真說、不生說、 諦說、無妄說、 無異及善說, 出微妙音聲, 大智善官說。 不緣慮諸惡, 身、口、意清淨, 第一智、解脫、 如來勝戒、定、 解脫知見等, 威儀常難思。 無上神通智, 利益最無比, 善得無垢行, 最勝微妙辯。 無上人中尊, 具足知牛死, 住胎既無比, 母族亦復然。 不思議殊相, 八十種妙好, 容色甚挺特, 端下無有比。 具足無惑心, 捨大捨亦爾, 超出一切欲, 五識無不具。 證智超六通, 具足四無礙, 難思眾神變。 借無量知見, 舍摩、毘婆那, 皆悉度彼岸, 威儀恒自在。 達捨離垢主, 眾中大神王, 徐行從彼來, 無著修伽陀, 一切勝智說。 行慈演法光, 能知大海水, 無邊深廣量; 不測無上力, 淨、戒、定崖畔, 雖歷億千劫, 不知其限齊。 以手接須彌, 上擲至梵天, 最初甚深定。 不能動如來, 遊獵虚空中, 可知其邊際; 如來不毀智。 無有能測度, 能以足履虚, 窮極其限量; 棄累人中尊。 不能測離垢, 如日能除闇, 悉見善惡色; 自然世間師, 能滅愚癡瞑。 一切皆欣樂; 譬如月盛滿,

法月光明王, 親者皆歡喜。 有眼無不見; 如夜然明燈, 調伏無比燈, 能演法光明。 善滅一切陰, 世師法燈炬, 官說自然法, 普聞於眾生。 大智勝醫王, 猶如涌流泉, 法藥消眾病, 能施一切樂。 普降於甘露, 譬如大龍王, 能令此大地, 一切皆霑洽; 大悲哀世尊, 法雨亦如此。 譬如師子吼, 蠕動皆怖畏; 如來震法音, 降伏諸外道。 譬如大牢船, 能運載一切; 佛度多億眾, 濟彼四流岸。 譬如優曇花, 奇哉稱希有; 人中尊難遇, 乃復渦於此。 一切諸世間, 常所歸依處, 如天喜見城, 婆梨質多花, 芬敷垂光綵, 諸天所遊樂; 世依踰於彼, 相好甚微妙。 世尊已為我, 示現諸神變, 我今少官說, 諸佛之功德, 以我所修業, 以施利眾生。」〇

## ◎菩薩念佛三昧經如來神力證正說品第七

爾時,世尊以金色手摩不空見菩薩頂上,出廣長舌而告之言:「善哉,善哉!汝不空見善說如來、應、正遍知真實功德,信如所言。又,不空見!若人說言:『無安、無救、無歸、無趣、無主眾生,如來出世能為如是諸眾生等作安、作救、歸、趣、主。』者,是名正說。又,不空見!若人說言:『如來出世說不思辯及無邊辯。』是名正說。又,不空見!若人說言:『一切眾生深著貪欲、瞋恚、邪見,如來出世悉能除斷貪欲等病。』是名正說。又,不空見!若人說言:『一切眾生嫉妬纏垢之所染著,如來出世悉令除斷。』是名正說。又,不空見!若人說言:『一切眾生無慚、無愧,如來出

世能使眾生慚愧具足。』是名正說。又,不空見!若人說言:『一切眾生深著慳慢,如來出世悉能除斷,令無慳慢。』是名正說。

「又,不空見!若人說言:『一切眾生無慈、無悲、無喜、無捨、不善惡念,如來出世悉令具足四無量心、利益善念。』是名正說。 又,不空見!若人說言:『一切眾生無諸善根,如來出世教化一切,令種善業。』是名正說。又,不空見!若人說言:『五濁惡世眾生病增,如來出世能作安樂。』此人所言即是我說。所以者何?我出惡世,說法利益諸眾生故。」

爾時,如來摩不空見菩薩頂時,於一念頃,此界眾生承佛神力,悉見東方清淨剎土無量無邊阿僧祇佛,及聞諸佛說法音聲;如是,南方乃至十方,如觀掌中菴摩勒果,一切眾生悉皆見彼清淨佛剎。又一念頃,如來、世尊、應、正遍知以金色手摩不空見菩薩頂已,以佛威神示現往昔最勝願力,即見上方清淨佛剎無量無邊阿僧祇數已滅度佛。又復受持三昧力故,得見未來一切諸佛。

時不空見覩諸佛已,即從坐起,齊整衣服,右膝著地,合掌恭敬白 佛世尊而說偈言:

「三千大千水, 人或知其限; 善調御世尊, 戒品不可量, 假使曠劫思, 不能測其岸。 如有勇健士, 一吹震須彌; 千劫不能動。 佛入初禪定, 能知其邊量; 足履虚空遊, 不能度佛智。 縱使窮劫中, 虚空無形量, 狂風亦能動; 莫能斷其辯。 世尊無煩惱, 如日照虚空, 其光甚明徽; 大仙 尊輝相, 映蔽於一切。 圓光甚可樂; 猶月星中最, 如是法月王, 一切皆歸仰。 譬如優曇花, 世間所希有;

調御天中天, 難值過於此。 今者大聖尊, 哀矜摩我頂。 燃熬利一切, 金色百福嚴, 深解真實諦, 功德悉具足。 言論人中上, 世依善官說, 敷演難思音, 普閏十方界。 以手摩我頂, 自然尊慈念, 得見恒河沙, 最勝世間王; 人中大牟尼, 一念摩我頂, 悉 親 恒 沙 佛 , 猶如阿彌陀; 天中尊利益, 一念摩我頂, 阿閦兩足尊; 得見不動界, 大悲所行處, 一念摩我頂, 一切世間師, 得見滅度佛, 大慈所行處, 善調伏諸根。 我乘昔願力, 即於摩頂時, 得見未來佛, 彌勒世依等; 即摩我頂時, 得見過去佛, 亦得覩當來, 十方難思尊; 佛眼調伏尊, 即時壓我頂, 復因宿妙願, 得見清淨剎。 如來不思議, 神通亦復然, 智、定諸功德, 皆不可稱量。 世尊慈悲故, 哀愍見教化。 如來金色手, 以壓我頂上, 得見十方佛, 金塔如恒沙, 無數諸如來; 復見十方界, 殊勝銀寶塔, 莊校種種色, 百千眾伎樂, 供養常不絕; 我又見他剎, 諸佛眾具塔, 金、銀及頗梨, 各高一由延, 不可以言宣; 端嚴甚精妙, 見諸牟尼塔, 種種七寶嚴, 住於虚空中, 天花悉周布; 又見殊勝塔, 高十二由延, 淨光照諸剎。 及親燈明佛, 我復見處處, 不思議眾塔; 又覩餘勝尊, 以手摩我頂。

佛以柔軟手, 一念摩我頂, 見彼諸如來, 安住於剎土; 或復在空中, 而現種種相; 未脫眾惑累, 復覩諸菩薩, 在無量佛剎, 修習諸苦行, 日夜常勤心, 以求勝菩提; 又見處處有, 無數諸菩薩, 常能為眾生, 作諸利益事, 燒身發光明, 以求道因緣; 復見諸菩薩, 安住於佛前, 供養滅度佛, 無量珍妙塔, 以求菩提利, 及以大威德; 燒身如燈炷, 見十方法緣, 書夜常修心, 不懈於食息; 又見諸菩薩, 捨國城、妻子、 頭、目、及髓、腦, 為安樂眾生。 我悉見彼此, 普眼世間尊, 威力得自在, 不可以言官。 如我所知者, 世間最為上。 天中天以手, 哀壓我頂時, 歸命人中尊。」 即得見彼眾,

## 菩薩念佛三昧經不空見勸請品第八

爾時,不空見菩薩摩訶薩白佛言:「世尊!如來處室宴寂既久,此會大眾皆悉渴仰。嚴座已訖,唯願世尊哀愍一切,屈就斯座。」時不空見更正衣服,合掌向佛白言:「世尊!今欲請問,願少宣說,我當至心聽受奉行。」

佛告不空見:「窓汝所問,當為決疑,令爾歡喜,諸天世人亦當證 知。」

時不空見白言:「世尊!菩薩摩訶薩親近修習何等三昧得見法樂、 增長其心?所聞三昧曠如大海、菩提之心安若須彌,外道邪風所不 能動,於無礙法心亦無著。猶如虛空,無所染污;破無明闇,亦如 朝日;施法光明,若月盛滿。燒一切陰熾然猛炎,焚諸煩惱之大火聚。譬如江、海、一切諸水,水性之屬依之而活。又如大船,能渡彼岸。亦如橋梁,能令眾生不墮生死煩惱駛流。猶若波梨質多羅樹生諸眾生,七菩提花悉能普薰十方世界。如優曇花,世所希有。亦如良醫善療諸患,大悲廣救,應病授藥。如栴檀樹能消熱惱。

「又如大雨,潤施一切。勝妙之法味若香蜜,令眾無畏,如師子 王。安樂眾生,過於慈母。深知法性,達義趣相,得義巧便;法相 亦然。善於正道具足方便,如實說法,得安攝眾,開發眾生生死根 源。一切法性如海一味,三昧安靜猶若山王,道心不動譬如帝幢。 得堅固力,身相端嚴,威儀具足,無所染污;族姓豪勝,功德備 足。得無邊辯、無所著辯、無異句辯、不思議辯、無邊量辯、深解 脫辯、成就勝辯、常忍辱辯、漸親近辯、問無問辯、無毀壞辯、無 退轉辯、甚深句字種種說辯、甚深廣說章句字辯、無量無邊喻譬之 辯,如是一切悉皆具足。未得道者當令得道,及得梵音、意歡樂 音、迦陵頻伽、師子等音,大龍、牛王、鍾鼓美音,歌音、弦音、 雷震之音得於一切世間供養,具足六通到於彼岸,得無忘失憶持之 法,獲諸善根、容儀、軌則。」

## 時不空見以偈問曰:

「金色百福嚴, 深解於真諦, 憐愍善利益, 聽我問諸佛。 應修何三昧, 具足淨功德, 眾智無過者? 人中無比尊, 我今問世間, 最勝無上主, 功德不思議? 為行何三昧, 云何諸菩薩, 而得人中上, 應當勤修習, 最勝寂靜定, 行此三昧已, 為世作利益? 云何得自然, 多聞如大海? 深妙 之智慧, 云何獲不動, 住佛諸功德, 猶如轉輪山?

云何心不著, 自然如虚空, 摧伏諸外道, 不起於惡心? 猶若日、月等? 云何當修得, 又復當云何, 同彼大燈炬? 求習何三昧, 光明照一切? 云何得消除, 眾生老、病累? 云何令一切, 得度於苦海? 云何得發心, 敬禮三界尊? 相好甚明著, 云何如天花, 優曇時一現, 值佛難於是? 施藥滅眾病, 云何如醫王, 善調伏諸根, 安住於戒品? 度無邊功德? 云何如法王, 云何見法滿, 猶如甘淨蜜? 施利於眾生? 云何師子音, 施眾難思樂? 云何如慈母, 云何得四辯, 行甚深菩提? 無上第一道。 為我說最勝, 云何能得說, 無著大智慧? 得法不思議, 云何義巧便, 知世、出世法? 善知巧便相, 云何能得意? 云何復得道? 云何安具足? 云何得憶念? 云何得多聞, 深廣若大海? 云何說諸佛, 直實之功德? 云何說眾生, 生死之源本, 諸法無異相, 如海同一味? 云何得三昧, 不動如山王, 菩提心安寂, 猶如帝釋幢? 云何得諸餘, 不思議菩提? 成就諸威儀? 云何得端嚴, 為功德法王? 云何得豪族, 云何得無邊, 及得無著辯? 不思句字義? 云何得成就, 唯願世間依, 為我分別說。 云何得最勝、 無上、莫能過, 無失與忍辱, 及以無著說, 親近不思議, 有問、無問等?

梵音、意樂音、 迦陵善妙音, 願尊教詔我。 得修菩薩行? 云何得師子、 大龍、牛王音? 云何得鍾音、 絃歌與美音? 云何獲聰慧? 願世調伏說。 云何得說法, 心常無厭足, 無毀諸功德, 常演震雷音? 云何當得官, 種種甚深法? 云何眾譬喻, 善說到六通? 云何不失法, 百千歲生念, 勤修不懈倦, 善法普眼尊? 若為十方界, 說修不思議, 於諸智不疑, 歸趣求解脫。 是以我今日, 請問於如來。」

時不空見菩薩摩訶薩如彼神通無作行力,於虛空中當世尊上,自然 變成天妙寶蓋,七寶莊嚴,種種微妙。於此蓋中雨眾雜花,遶佛三 匝,住在頂上,花傾恭敬向佛世尊,即於花中而說偈言:

「歸命於大聖, 正覺兩足尊。諸天及世人, 無能與等者。」

爾時,此花墮佛足上復更踊起。起已,自然遍散三千大千世界。復於蓋中雨栴檀末,空中交紛墮於佛上。俄爾之間忽然不現,香氣芬芬充溢大千。是諸眾生聞此香者,身心安隱,皆得快樂,猶如菩薩得四禪樂。

時不空見現神通訖,即白佛言:「云何菩薩得大智慧、速疾智慧、 猛利智慧、無相智慧、甚深智慧、廣大智慧、普遍智慧、不懼智 慧?云何獲得無上善根,心如金剛,壞諸法相;身心柔軟,心大如 海;戒品難量,心如磐石;其心柔和,正直端嚴;心如山王,攝眾 善法;心如大地,能安一切;得不信他,不譏彼闕;得善趣行,安 住諸法;正向不謗無上世尊;生生恒得無離見佛;住此世界得見他 方無量諸佛、聞法、遇僧?又得攝取清淨國土,常得善根,自利、 利他?是以我今請問世尊。我為解脫饒益眾生,為諸菩薩得不思 議、具足善根,請問如來;為被僧那忍苦大鎧、悲一切故,請問如 來;為欲利樂諸眾生故,被弘誓鎧、無眾生想,欲度生死、無生死 想,我恒如此利益眾生,是故我今請問如來。

「世尊!我於諸眾生所不起壞心,亦無瞋罵、誹謗、毀呰及輕凌心,初無恚恨、忿戾、懟恨,無忘失意、亦不嫉妬,不懷楚毒、行於慈悲。我如是相修學大乘,為利益故請問如來。世尊!我今為眾生故,捨五欲樂、能忍眾苦、施一切樂,為諸眾生作法光明。世尊!我於內外諸法心無悋惜,我如是相利眾生故,請問如來。世尊!我今被弘誓鎧,為一眾生於恒沙劫入大地獄受諸苦惱,我未曾於一念之頃退失無上菩提心也。是故我今利眾生故,悉能忍受無量極苦而不退於菩提之心。為一切故,請問如來。我今如此被弘誓鎧,為諸眾生作其僮僕,為利彼故,請問如來。世尊!我今為眾生故,捨於頭、目、髓、腦之屬,悉忍斯苦不退菩提。如是相貌,請問如來。」

## 時不空見即說偈言:

「云何習大智、 廣智與疾智? 我今故請問, 大雄世間師。 云何得甚深, 微妙大智慧, 最勝菩提道? 唯願普智說。 云何無懼智, 善巧隨順說, 於法不生惑? 復得金剛心, 云何得柔和, 心無有垢染, 清淨戒如海, 不宿於死屍? 不動難思議? 復得心如山, 云何不信他, 亦不譏彼闕, 決定行善趣, 閉塞諸惡道, 安住堅固志, 歡喜心不壞? 云何得生念? 又得於調伏,

他方剎十佛, 住此而得見, 既得聞說法, 亦得值遇僧, 他方剎土佛, 欲得求供養, 種種妙花香, 隨意以奉獻。 欲求住此界, 見諸無邊剎, 世依示神誦, 向諸十方國。 我自饒眾生, 亦無善友勸, 安住諸慚愧, 自捨於己利, 以利於他故, 請問大勝尊。 攝取不思善, 若為求佛智, 為此利益故, 請問於如來。 無著世間依, 當修何三昧? 如是為眾生, 發弘誓大願, 免濟諸群生, 種種諸劇苦。 而無眾生想, 雖復勤修行, 為利善趣故, 請問於如來。 常起平等心, 於一切眾生, 未曾有分別, 恒修於慈悲。 我為利益故, 請問於如來, 親折何等法, 疾得難思定? 調御說斯定, 顯示無邊德。 為利一眾生, 我發弘誓願, 於不思議劫, 恒受燒煮苦。 善哉!令一切, 長得獲安樂, 永無幻惑心, 常修正直意。 恒捨內外法, 攝取諸眾生, 為作利益故, 請問普眼尊。 穢謗、結恨等, 不瞋、不惡口、 自身能忍苦, 為他作僕使, 是故我請問, 大威德世尊。 常以歡喜心, 勤修菩薩行, 捐棄無量頭, 以求勝菩提, 為益世間故, 捨目、及手、足。 癡暝無智慧, 眾牛騎牛死, 何方救濟彼, 令得永解脫? 捨所愛妻子、 珍妙諸器服、 金、銀、頗梨、珠、 無數眾寶藏, 為趣正道故, 請問於如來。

慧施常無厭, 聞法亦復然, 住於阿蘭若, 心無有懈退, 為此利益故, 請問於如來。 聞惡恒捨離, 常求善言教, 於諸群生類, 初無不善念, 為是利益故, 請問於如來。 如母念一子, 慈心觀眾生, 於讐不追怨, 更生<mark>憐</mark>愍心, 為利一切故, 請問人中王。 若獲諸福報, 設復無所得, 亦當為眾生, 請問大威尊。 我請自然尊, 若得少福者, 以此業果報, 疾得菩提定。↓◎

### 菩薩念佛三昧經卷第三

宋天竺三藏功德直譯

### ◎讚三昧相品第九

爾時,世尊告不空見菩薩摩訶薩言:「善哉,善哉!不空見!無勸汝者乃能如是為諸眾生請問三昧,欲以解脫利眾生故、欲令眾生具不思議淨善根故、欲令眾生獲得三界最勝利故、為令眾生超出三界一切行故、為令眾生於諸有為得善義故、為令眾生深解隨順得饒益故、為令眾生於甚深法決定義故、欲令眾生尊說法故、欲令眾生敬重施故、欲令眾生捨諸有故、欲令眾生趣無上戒故、欲令眾生具足忍故、欲令眾生勤精進故、欲令眾生得禪定故、欲令眾生严重智慧如金剛心善修定故、欲令眾生心離塵故、欲令眾生善攝心故、欲令眾生其心不動猶帝幢故、欲令眾生重法義故、欲令眾生不惜身命厭諸行故,以是等緣請問如來。」

爾時,世尊告不空見:「汝今諦聽,善思念之,吾當為汝分別演說。」

時不空見即白佛言:「唯然,世尊!願樂欲聞。」

告不空見:「諸佛所說菩薩所行念佛三昧,此三昧者,諸菩薩等常應親近、精勤修習。既得修習此三昧已,即便增長見法安樂,增長無貪及以瞋、癡,增長慚愧、六神通等,增長得見一切諸佛,增長無數清淨佛土。得知宿命生死因緣,住胎清曠、母族豪勝,得微妙善善、大人相好。具足出家及捨大捨,得知眾生其行相續,具足多聞世出世法。又得種種諸善法處,當得善學世無比法,復得善巧說一切法,及得了知前際、後際。字章句相智慧備足,得善轉心、神通變化,善知過患,得廣大力。得知他方諸菩薩等,及以眾生精麁、

白黑、長短、大小、處及非處,未成佛道趣向具足。得不動念,神 通具足;常得大姓,高族具足;端正威勢,功德具足;得梵音等及 以諸辯,無不具足,悉如上說。同如來生無生之生,常生中國,不 處邊地,欲求遍往他方世界至諸佛所諮受正法,欲樂住此或遊十 方,觀諸如來恭敬供養。彼此菩薩功德具足。」

### 爾時,世尊即說偈言:

「不空見菩薩! 有妙三昧王, 我住智力故, 深知此三昧。 菩薩應當修, 得見十方佛, 到六通彼岸, 疾得菩提道。 見諸淨妙十, 攝知生死緣, 住胎既無比, 母族又殊勝。 相好皆具足, 善修諸法行, 出家棄諸愛, 人天所滯慾, 為利世間故, 求於菩提道。 牛在豪姓家, 永到甘露境, 具得六神涌, 圓足說直智。 多聞持正法, 獲得大自在; 多聞廣於海, 如聞皆修行。 及知眾生本, 具眾決定義, 善法之所趣。 學習世、出世, 捐去無知業, 獲得聰利智, 棄捨有為事, 行於無為法。 亦得天眼智, 天耳聞諸法, **憶念宿世行**, 知他心意識。 欲樂現種種, 諸妙神通事, 常善轉變心, 開演於明脫。 廣利於世間, 開發十力慧, 知處及非處, 諸法之所歸。 說煩惱過患, 常應修此定, 得趣向具足、 得意無與等、 得念及威力、 得安行亦然。 姓族最殊勝, 端嚴甚清顯, 無毀諸功德。 棄於有為行, 人中最殊勝, 得大威勢力,

猶如天帝釋, 天中獨尊嚴。 雄猛諸威音, 欲得無比音、 成就義大仙, 當求此三昧。 普施電光耀, 如龍歡喜行, 復降甘潤雨, 霑洽於大地, 是龍所游境, 實為不思議。 若安住最上, 神通王三昧, 能作諸供養, 奉獻無邊佛, 猶如龍王雨, 澤及於一切。 欲成就善教, 親折最上說, 攝取無為樂, 當修此三昧。 種種深解脫, 常官諸妙偈, 欲令一切眾, 咸使得安樂。 不離佛菩提, 常修是三昧, 及與聲聞眾, 得見他方剎。 若欲得諮問, 此十之世尊, 及諸他方佛, 應習此三昧。 若欲見他方, 不思議世尊, 親近彼諸佛, 蒙光設供養, 往扳諸剎十, 得無數功德。 應當修諸佛, 所說深三昧, 恒得與佛俱。」 往往從牛處,

# 菩薩念佛三昧經正觀品第十

爾時,不空見菩薩白佛言:「世尊!菩薩摩訶薩若欲成就諸佛所說菩薩念佛三昧者,應當親近修習何法?」

爾時,世尊告不空見:「若諸菩薩欲得修習諸佛所說念佛三昧、欲得親近諸佛如來、復欲疾得阿耨多羅三藐三菩提者,應當安住決定之心,又應永捨不決定心、捨我見心,知無我心。當觀此身如水聚沫、觀於色陰當如芭蕉、次觀受陰如水上泡、復觀想陰如熱時焰、又觀行陰如空中雲、觀於識陰猶如幻化。

「菩薩若欲入此三昧,應當深生怖畏之想。又宜具足慚愧之心,捨不怖畏而作怖畏;捨無慚愧,修慚愧心。具舍摩他、毘婆舍那,以方便智捨我無我,應習智脫及三空門。又當深知三受生起,亦應捨離三不善根。即當起於三昧之聚,觀諸眾生猶如我身;觀四念處,身受心法;觀四食患,作無食想,所謂摶食、觸、思、識等。修不淨想及以慈悲,安住於喜,令捨具足。

「起諸禪定而不味著,亦不毀呰一切諸法。此身不實,猶如幻焰,不樂長壽,應當捨離。善防護心,習學多聞,不慢於法,勤護不謗,即得聞才及以法才。既聞法已,守護是義,尊重佛法、恭敬僧寶。近善知識、遠離惡友,不著世俗言論之味,恒能不離阿蘭若行。心常平等憐愍眾生,其心不退、不懷嫉妬。稱量諸法,心不染累,分別一切無數諸法。常求甚深方等經典,信心堅固不生疑慮,常能精勤讀誦此經——即是諸佛無上道也。

「諸佛功德之所生處,應當如是真實其心,摧伏憍慢,至意聽受,增長正法。離殺、盜、婬、懶惰、貢高、是非之心,捨存真我、邪謗之說,除穢亂語、滅諸諍論。心樂安住布施、持戒、忍辱、精進、禪定、智慧,諸波羅蜜皆悉具足。能捨頭、目,心不退沒,如四大姓不可改易。身意精勤,不顧驅命,於四供養心無貪著。安住十二頭陀之行,不求己利及以名譽。捨心愛滯,得四神足,離四顛倒及煩惱刺,渡於四流,於四威儀修四念處。令得五根,修行五力,捨於五結,不求五欲福報之慶,捨五穢心,修五解脫,善知五陰。棄六欲處及六身受,除六愛身,修於六念,知六識分,勤求六通。修七覺意,深知七界,所謂害界、恚界、出界、欲界、色界、無色界及以滅界,除斷七使及七識住。捨八賴惰,去八妄語,知世八法,得八大人覺,知八解脫,修八正道。捨於眾生九居之處,除九慢法,放棄九惱,親近修學喜等九法。又復勤習九次第定,捨十不善、行於十善,方便精勤求佛十力。

「又,不空見!我今略說一切諸佛所說三昧,應當勤修念報佛恩。 學三昧已,即得不退阿耨多羅三藐三菩提。而是菩薩以大智力,能 為眾生說此三昧,其餘聲聞不能觀察、宣說、書寫、受持、讀誦; 若能觀察、書寫、受持、讀誦之者,此人福業亦不唐捐。要當得值 佛出於世,若諸菩薩教化受持,疾得不退菩提之道。又,不空見! 諸佛所說念佛三昧,名為要法,諸大聲聞所不能行。若人聞說此三 昧者,將來之世必當值佛。」

### 爾時,世尊即說偈言:

「若有修諸佛, 所說深三昧, 觀法心相續,捨不相續念, 善觀於陰身, 離我、無我想。 此身不牢固, **猫如水聚沫、** 虚誑猶如化、 亦如嬰兒語。 觀色如浮雲、 見受若水泡、 想如熱時焰、 觀行陰無實, 猶如彼芭蕉、 觀五識如幻。 舍摩、毘婆那, 修慚愧、恐畏、 應遠無慚愧, 除我無我見。 及以三空門, 習如與解脫, 又應知三受, 捨三不善根。 常學三善根, 求最勝三昧; 勤行戒、定、智, 速得甚深定。 離諸邪見等, 正習此三昧; 捨世眾諍論, 常修出世法。 觀察身念處, 受心亦復然, 於法無疑惑, 不久得此定。 不惜身壽命, 常行禪解脫, 不誹謗諸法。 多聞、不貢高, **盟**法應受持, 持已諦觀察, 常供養諸佛, 法、僧亦如是。 若於善知識, 恒念報其恩; 猿諸惡知友, 不聞邪師論。 應求讚善者, 常共俱遊處; 不遠阿蘭若, 應求勝菩提。

等心於群生, 不毀呰諸法, 不染一切法, 應知真實法。 捨諸非法行, 不久得此定, 除一切諸惡, 及見真我者, 殺害、慢、婬、盗、 毀呰、賴惰等, 邪論、諍訟等。 不作諸惡口、 次第說佛法, 當求此三昧, 施、戒、及忍辱、 精進、禪、智等, 常勤精修習, 成就此諸度, 不久當得斯, 功德、定、法行。 若捨內身分, 及外財眷屬, 不久得菩提, 最靜心三昧。 若人心如地、 水、火、風空等, 皆悉當速疾, 獲此妙三昧。 若有諸人等, 身心甚端直, 床褥及醫藥, 不貪著衣食、 是人當疾得, 如此之三昧。 具足四如意, 成就四正勤, 及四煩惱刺, 捨於四顛倒, 棄捨諸受、取。 永度於四流, 修行五根力, 除斷於五結, 捨諸煩惱心, 不求五欲報, 應修五解脫, 及五身三昧, 諦知五陰法。 深修六和敬, 猿離不恭敬, 除去六觸身, 捨彼六愛身, 觀六度相續, 成就於六通, 深修六念處, 亦復勤專行, 六識之法分。 修七菩提分, 復行於七財, 念捨憍慢處, 除斷七種使; 當修如此行, 以求勝三昧。 捨彼七識住, 除此八妄語, 得三昧不難。 常修八正道, 得八大人覺, 行八解脫門, 知世間八法, 即為最勝智, 如此常修行, 得三昧不難。 自離於九惱, 亦不惱他人, 次當得三昧。 修喜等九法,

聰慧捨十惡, 修行十善業, 又能導十力, 得三昧不難。 常受持善法, 捨諸不善法, 書夜常攝心, 得三昧不難。 不思議力說, 住此三昧已, 常見佛金色, 亦得閩演法。 若欲見十方, 滅度、現在佛, 及以未來世, 饒益眾生者, 是人當修此, 最上妙三昧。」◎

◎爾時,不空見菩薩摩訶薩白佛言:「世尊!菩薩若欲成就一切諸 佛所說念佛三昧,云何當令其心相續?」

佛告不空見:「是諸菩薩若能至心憶念過去、未來、現在十方一切無量如來、應、正遍知、明行足、善逝、世間解、無上士、調御丈夫、天人師、佛、世尊,悉知眾生往來生死、住胎具足、母族亦然,及善相好、四毘舍羅、慈悲喜捨、慚愧、恐畏、威儀等行悉亦具足,及舍摩他、毘婆舍那、解脫知行,諸解脫門、念處、正勤、神足、根、力、覺、道等法皆悉具足。知昔四流及生具足,亦知眾生源始具足,生諸六通,起大神足。戒、定、智慧、及以解脫、解脫知見無不具足,無礙解脫及無礙利,一切善法亦皆具足,色心清淨、境智清淨,金色等身清淨具足。而此菩薩應如是念:『諸佛如來至心不動。』亦當安住無所著心。

「復應如是心相續觀:為何等法是如來耶?為以即色是如來耶?為當異色是如來乎?若以即色是如來者,色處眾生具足色陰,而是眾生應是如來。若以異色是如來者,除十二緣豈有如來?又以即受是如來耶?為當異受是如來乎?若以即受是如來者,一切眾生具足受陰,而是眾生應是如來。若以異受是如來者,除十二緣何有如來?想、行、識等亦復如是。為即眼根是如來耶?為異眼根是如來乎?若即眼根是如來者,一切眾生應是如來。若異眼根是如來不等,除十二緣何名如來?耳等諸根亦復如是。為即四大是如來耶?為異四大

是如來乎?若即四大是如來者,內外四大亦是如來。若離四大是如來者,除十二緣何有如來?地、水、火、風皆亦如是。

「菩薩如是相續觀已,明見色陰既非如來,異彼色陰亦非如來;又 見受陰即非如來,若異受陰亦非如來;即想、行、識非如來者,異 想、行、識亦非如來。又見眼根非即如來,見異眼根亦非如來; 耳、鼻、舌、身非即如來,異耳、鼻等亦非如來。見色、聲等非是 如來,異色、聲等亦非如來;見香、味、觸非是如來,異香、味、 觸亦非如來;見意及法非是如來,若異意、法亦非如來。見即四大 非是如來,見異四大亦非如來;地、水、火、風亦復如是。菩薩如 是心相續觀,於一切法得方便智。

「又,不空見!汝以何法能得無上菩提道耶?為以身得?為以心得?若以身得,此身不淨,無所覺知,如草木、瓦礫。菩提非色,無有形質,其相空寂,不可見法。此身既如草木無知,云何當得菩提道耶?若以心得無上道者,心無形相,猶如幻化。菩提無心、亦無色貌,如幻、如化,云何可得?若諸菩薩得如此解:非身能得無上菩提,亦非心得無上菩提,不離身、心得無上道。」

爾時,佛告不空見言:「應當如是觀於如來,作是觀者名為正觀。又,不空見!菩薩如是相續觀法,心不動搖。菩薩應當如是深解,則不退於三昧法也。又常離於不相續心,必當疾得無上菩提。」

## 爾時,世尊即說偈言:

「心心相續念, 去、來、今現在, 一切普眼尊, 不久當見佛。 住佛大威力, 慈哀利世間, 憶念人中華, 調御功德尊。 當念昔生死、 住胎、母族姓、 容相悉具足, 不久當見佛。 念佛八十好, 及宿世因緣, 恒集最勝業, 正念善法意。 及大自在通, 念佛六神變, 戒、定、智解脫, 皆悉得成就。 云何最上師, 得此寂靜地? 念慈世間尊, 悲、喜、捨最上, 慚愧、力、無畏, 世間威德師。 念佛舍摩他、 毘婆舍那等, 及以三空門, 又念智解脫, 具念修正勤, 神足亦復然。 念、根、力具足, 及以菩提分, 獲此寂靜處。 念佛離牛、滅, 念難思善法, 色、受皆清淨; 想、行及以識, 清淨亦如是。 念佛真金色, 安住無著心, 觀何法名佛, 攝心恒相續。 念色非如來, 四陰亦如是; 想、識應當知。 離陰非如來, 念眼非如來, 耳等法亦然; 離眼非如來, 五情法皆爾。 念十二因緣, 調心得見佛, 念四大非佛、 異此四亦非, 應了十二緣, 見佛不為難。 若使諸佛陰, 而是如來者, 亦應即如來。 眾生悉有陰, 當念十二緣, 若欲得根、力, 陰非世間師, 異陰亦如是。 往昔諸因緣, 相續恒分別, 是以能攝取, 不思議智力。 如草木、瓦礫, 此身常無知, 菩提無形色, 寂滅恒不生。 身不觸菩提, 菩提不觸身; 菩提不觸心; 心不觸菩提, 實為不思議。 而能有觸相, 此是佛世尊, 最勝寂靜處, 善能滅一切, 外道諸邪見。」

爾時,不空見菩薩摩訶薩白佛言:「世尊!菩薩云何得知我見?云何復當得離斯見?」

爾時,世尊告不空見:「菩薩若欲捨我見者,莫著住處,當依無依,欲以法明利益一切;欲吹法螺、擊大法鼓;欲造法船、建立法橋,度諸眾生生死有流。欲觀身相及不相續,此身不淨,穢惡充滿,膿、血、涕、唾九孔恒流,無常敗壞,眴息不住,危脆難信,不可愛樂,猶嬰兒語虛妄無知。是身不實如水聚沫,縱復假以衣服、飲食、香熏莊嚴、種種寶飾,於百千歲恣隨其意,會當磨滅,長夜無益,如此身性是生死法。又為虫獸之所食噉,復於長夜或在地獄、畜生、餓鬼、閻羅王所受無量苦,未曾暫息。又於永劫處生死中,為他僮僕,策使萬端。此身長勤受眾苦惱,而初不能知苦斷習、證滅修道、行諸功德。此身雖小,受污甚多,應以是身施諸眾生一一若有惜命施其以壽、若須力者當惠其力、須肉與肉、須血與血一一當施須者,不求勿與。或於彼人無所利益,願以捨身善心因緣除我見惑、得解無我。住是捨身思惟觀時,不復著於我見之惑,以不堅身修於堅身。

「又,不空見!譬如村邑,多有童子相隨出村,遊戲水邊。見水聚沫,是諸童子競取弄戲,而此聚沫不自覺知為他所弄亦無痛痒。如是,不空見!若有菩薩觀自己身,當知此心猶彼聚沫,無有分別。若此菩薩作是觀者,不久當得此深三昧,亦當疾得無上菩提。」

## 爾時,世尊即說偈言:

「欲求最勝定、 得不思菩提、 永捨於我見, 常應觀此身, 無常、苦、不淨, 涕、唾、臭污等, 九孔流諸穢, 甚為可厭患。 虛誑無真實, 此是磨滅法, 眩惑猶幻化、 亦如水聚沫。 我此身危脆, 瘡疣之窟宅,

周遍皆臭毒, 無一可樂處。 養之初無益, 卒為虫、狼食, 一切諸樂具, 供饍於此身, 終不得一實。 會歸當朽滅, 苦痛恒萬端, 長勤無邊劫, 地獄、畜生報, 根本受苦處。 不可不思議, 長夜增飢渴, 眾苦所逼迫, 為此乖菩提。 我此身不實, 應施諸眾生, 所須便給之。 解法心無惜, 即唱如是言: 作此思惟已, 『我今捨此身, **血、肉**腐意取。 我當惠其壽。』 若有惜命者, 亡驅濟眾生, 為疾得三昧。 段段求水沫, 未曾得堅實, 我身亦如是, 求真不可得。 若得此下觀, 疾成菩提道。」

爾時,世尊即便微笑。諸佛如來法皆如是:當于世尊微笑之時,面門即放種種色光——青、黃、赤、白、紅、綠、頗梨——上至梵天,從彼還下,遶佛三匝復至頂上。斯光俄頃忽然不現。長老阿難即從坐起,更整衣服,右膝著地,合掌向佛,以偈問曰:

「最勝調御尊, 微笑非無緣, 無上世間師, 願為我官說。 而現此微笑? 為以何因緣, 金色百福嚴, 善解於直諦, 哀矜利益者, 世間所歸趣。 而現此微笑? 為以何因緣, 無等人中尊, 最上無過者, 如來諸功德, 清妙無瑕穢。 復以何因緣, 而現此微笑? 住聖大悲尊, 一切所歸者, 已離諸煩惱, 以淨調御音, 唯願為我說, 微笑之因緣。 今日誰應得, 若此深廣義? 誰住堅固地? 誰國遇吉祥?

世間所歸尊, 何故現微笑? 一切所歸趣, 調御為我說。 願聞清淨人, 微笑之因緣, 若蒙聖開演, 疑惑則永除。」

爾時,世尊告阿難言:「我向說此相續觀時,三萬人得法眼淨;八萬百千億那由他天亦悉離垢,法眼清淨;復有三萬億那由他比丘、比丘尼證阿那含;復有三萬比丘、比丘尼及清信士女得無生忍;三萬眾生發菩提心,即皆修習菩薩之行,於人尊劫悉當成佛,此是初發無上道心;復有九萬億那由他諸眾生等,悉皆不退菩提之道,當得作佛,號曰放光,及離垢尊、釋迦牟尼、日光相佛、月光明佛、天中尊佛;九十二億那由他眾發聲聞心,當成羅漢。」

爾時,世尊作是語時,聲震三千大千世界。佛以天眼見於十方九十億百千那由他諸佛剎土,其中眾生皆見如來放眉間光——名曰明焰——遍照十方。眾生見已,心驚毛堅。時彼剎土無量百千萬億那由他諸眾生等遇斯光者,其中有得須陀洹果、斯陀含果、阿那含果、阿羅漢果;有多眾生發菩提心,皆不退轉無上菩提,於未來世當得作佛,皆同一號——號不退轉。

# 爾時,世尊欲令此義光宣明顯,重說偈言:

「我向官說此, 心相續觀時, 即有六十千, 九十九億眾, 以聞法利故, 而發菩提心; 皆得聖慧眼, 復有三萬人, 已閏相續念, 寂定之菩提, 此等悉得免, 惡道之苦難; 八萬億諸天, 既聞如來音, 獲得淨法眼, 永離惡趣苦; 三萬億四眾, 得不起法忍, 度脫諸惡道, 無復苦惱患, 當得成佛道, 如春之敷榮; 學於菩提道, 三萬億諸人,

是人亦當得, 諸佛大威力, 既成無上道, 憐愍於世間; 六萬千天子, 學習於菩提, 樂中之樂行, 猶如彌勒尊。 無礙世間依, 以笑廣利益, 阿難!汝當知, 皆有因緣故, 是以我今日, 示發此微笑。」

# 菩薩念佛三昧經微密王品第十一

爾時,不空見菩薩摩訶薩白佛言:「世尊!菩薩摩訶薩云何當知安住慚愧、恐畏等法,捨無慚愧,得此三昧?」

爾時,世尊告不空見:「此諸菩薩所以慚愧,身作諸惡而懷羞怖,口、意行惡復生恥辱,嫉妬、賴惰亦復如是。若起不善恭敬諸佛、畏懼諸天及以世人,惡不善法可羞恥故,菩薩如是則住慚畏。捨無慚畏、諸不善法,勤修眾善、護清淨行,默然閑寂,三業具足,不久亦當得此三昧,生生恒得值遇諸佛,當疾得於阿耨多羅三藐三菩提。

「又,不空見!奇哉,希有。我念過去經阿僧祇億百千萬那由他劫,初第三劫名為善生、次復有劫名曰寶炬、次復有劫名蓮花池。時濁劫起餘一千年,次復有劫名曰樂住。時有國王生此劫中,名勝微密,有大威德,勢力自在。王所住城名拘修摩清淨香聚,其城縱廣七十由延,有十二重七寶莊校,嚴麗光明如善建城。城北有地,名為離垢。此處有苑,苑名安隱,縱廣正等,面十由延,周匝皆有諸多羅樹,其苑法式猶善建園。又,不空見!爾時有佛,號曰明相如來、應、正遍知、明行足、善逝、世間解、無上士、調御丈夫、天人師、佛、世尊,出現於世。」

佛告不空見:「時明相佛與其眷屬住安隱園,所從比丘九十九億百 千那由他,皆阿羅漢,諸漏已盡,無復煩惱,心得自在,所作已 辦,所應學者皆悉已學。明相如來、應、正遍知,於其晨朝著衣持 鉢,翼從比丘入城乞食。時微密王聞佛當來,即乘大象——象名樂 手——前後導從無數百千,皆共出城奉迎世尊。

「又,不空見!是微密王遙見佛來光色相好,微妙殊特,皆大歡喜。即便下象,趣如來所,頭面禮足,右遶三匝,即於道路請佛及僧。時明相佛默然許之。王既知佛已受其請,即於其夜掃灑、燒香、嚴辦種種珍妙供具。復於城內遍竪幢幡,懸諸華鬘、瓔珞、寶蓋,牛頭香汁以灑塵坌,散種種花嚴飾於地,以篋盛花置於座前,作眾妙伎以用供養。

「又,不空見!王辦供已,於晨朝時與諸營從詣安隱園頂禮如來, 白言:『世尊!食時已至。』時明相佛聞王請已,即如其相現大神 通,與諸比丘俱昇虛空,放淨光明九萬百千照於東方;三方亦然。 一一光中有八十億那由他等諸妙蓮華,一一華上有化如來,相好具 足如明相佛。是諸如來,眷屬無量,左侍帝釋、右侍梵王,猶如真 實釋、梵無異。

「又,不空見!明相如來現此種種神變相時,一念之頃,欲色諸天即作無量眾妙伎樂,以天栴檀、多摩羅跋、沈水、華鬘如是諸香,以用供養明相如來。時彼世尊為王說法:『大王當知,諸行無常、有為皆苦、不實故空,一切諸法悉無有我。所以者何?此身不淨,九孔流穢猶糞中虫,破壞危脆,念念不住。四大諸陰假以為身,飢、渴、寒、熱恒來侵迫。虛誑幻炎猶水聚沫,不得自在磨滅之法,強名為人,無一可恃。是故,大王當深觀察,生死諸行甚可厭患,當勤方便,求速遠離。』時微密王聞是語已,合掌向佛而作是言:『如是,世尊!誠如聖教。有為諸行無常、苦、空,一切諸法皆悉無我。現見此身不淨臭穢,眾苦之聚甚可厭患。』時王見佛神通相貌及聞如來所說之法,即發阿耨多羅三藐三菩提心。

「又,不空見!時彼如來知王已發菩提之心,與諸大眾俱受王請, 乘虛而往,至城便下。是王從佛步入宮門,獻座已訖,次第而坐。 王與群臣、宮內眷屬,及國人民侍立左右,擎諸供饍前受嚫願,各 各授食皆令充足。飯食已訖,漱口、澡手,復以種種華香、伎樂、 名衣、上寶而以供養。時微密王即於是日,捨四天下及八十四億那 由他妃后、婇女,以國王位付其長子,與八十億那由他人俱共往詣 明相如來,於彼佛所出家修道。

「王出家已,將欲請法,白言:『世尊!云何菩薩得諸佛所說念佛 三昧?若人能得此三昧者,當疾成於阿耨多羅三藐三菩提、具足見 法。』時明相佛告微密比丘:『菩薩有二法得此三昧,亦當疾成無 上菩提。何謂二法?菩薩應當信於如來所說經典,此大方等諸佛行 處。菩薩具足此二法者得此三昧,當疾成佛。復有二法。何謂為 二?舍摩他、毘婆舍那。復具二法:捨我無我,安住慚愧、恐畏等 法。菩薩若能具是二法,得此三昧,疾成正覺。』」

告不空見:「是微密比丘白明相佛:『云何菩薩安住慚愧、恐畏之法得此三昧?』明相如來告比丘言:『菩薩應當捨三惡業、無慚愧等諸不善法,住於慚愧、恐畏之法。而是菩薩慚、畏具足,捨諸不善、修行善法,應護清淨身、口、意業。』

「又,不空見!是時比丘於彼佛所聞說過患,即捨無慚、恐畏諸 惡,精勤攝心,住諸善法,不失善法,欲令滿足。復更攝心安住正 觀——觀一切法不增、不減,亦不見法去、來,生、滅。

「微密比丘作是觀時,不見諸法有種種相。觀十二緣,如夢、如 炎;觀於諸法,如影幻化;觀於諸法,無增、無減;觀於諸法,無 名、無性;觀一切法,無滅、無生。微密菩薩如是修行,不久當得 此三昧也。獲三昧已,辯才不斷,過六萬億那由他劫當得阿耨多羅 三藐三菩提。」 佛告不空見:「汝莫生疑,爾時捨國出家學道微密王者豈異人乎? 蓮花上佛如來是也。微密菩薩安住慚愧,修習成就一切善法,不久 便得如此三昧。

「又,不空見!我今語汝諸佛所說念佛三昧,若有眾生不種善根,終不得聞如此三昧。」

告不空見:「若善男子、善女人等,曾於過去無量佛所親近、供養、殖眾善本,方得聞此三昧寶王。何況書寫、讀誦、受持、分別解說、觀其義趣?是善男子、善女人等,所種善根無量無邊,不可稱計。是諸人等修菩薩乘,方得少聞如此三昧,次第當得阿耨多羅三藐三菩提;唯除身證。」

時不空見白言:「世尊!是諸眾生不學大乘,為能得此三昧寶 不?」

佛言:「如是,亦當能得。又,不空見!譬如有藥,其質堅抑,不可斫刺,以石磨取,用之塗鼓。若有怨敵臨陣戰時,彼軍亦以毒塗其箭,聞鼓音聲,毒不能行。如是,不空見!若善男子、善女人等少得遇聞三昧光聲,是人皆當得於無上菩提之道;唯除身證。

「又,不空見!譬如眾生若依須彌金色之邊,其身即與彼山同色。 所以然者,山勢力故。如是,不空見!若有善男子、善女人等少聞 三昧威光之力,當得阿耨多羅三藐三菩提;唯除身證。所以者何? 而此三昧功德最勝不思議故。

「又,不空見!譬如諸水,悉入大海,同其一味。所以然者,以海 力故。若善男子、善女人等不能讀誦、持、說、書寫,但得暫聞此 三昧寶,一切皆當得無上道。所以者何?三昧力故。 「又,不空見!若人正說:『諸佛法門得三昧母,說此三昧。』是 名正說。若人正說:『如是三昧,無量無邊功德之聚,攝取長 養。』是名正說。

「又,不空見!菩薩摩訶薩修行布施,於一念頃以眾妙寶奉獻恒沙 諸佛世尊,以此功德當得成佛。若人讀誦、受、持、解說、書此三 昧,功德勝彼布施之福不可稱計。」

## 爾時,世尊即說此偈:

「我念往昔生, 調御明相佛, 一切諸世間, 咸共所歸趣。 慈悲哀眾生, 為說眾妙法, 是佛大知見, 明了三世法。 世間最為上。 如此普明尊, 如來不思議, 無量深智力, 開顯諸法門, 為利群牛故, 發起大悲心, 拔濟無量苦。 八億聲聞眾, 明相善浙尊, 皆是阿羅漢, 諸漏悉已盡, 是諸應真等, 隨從法王逝。 時有安隱園, 在城東北隅, 恒與聖眾俱。 大们經行處, 時有轉輪王, 微密勇健士, **導從出彼城。** 燃愍—切故, 是王搖覩佛, 其心甚寂怕, 相好殊世表, 威儀亦無比。 王即步奉迎, 往到世依所, 既至如來前, 頭頂接足禮。 合堂恭敬已, 往住於一面, 請佛受明供, 世尊默然許。 環勅諸官屬, 王知佛垂許, 嚴辦諸餚饍。 灑掃宮城內, 白言:『食時至, 王復到佛所, 世尊若矜愍, 願時屈威神,

與諸聖眾俱, 至當奉微供。』

```
時佛聞王請,
        即現大神變,
        遍滿十方剎,
普放千億光,
        化作億蓮華。
——光明中,
        為眾現斯瑞。」
大悲愍眾生,
又告不空見:
        「彼諸蓮華中,
有大威德王,
        相好特端嚴。
        廣說諸佛法:
各以最勝意,
『諸行皆無常,
         苦、空亦如是,
        此為磨滅法。
無我恒不實,
有何聰慧人,
        而生樂著心?
諸行猶幻炎,
        破壞流動法。』
大悲明相佛,
        演說如是法。
諸天見世尊,
        奮大神通時,
作眾上妙伎,
        廣設香花供:
          不可得稱說。』
『善哉!佛威力,
王覩神化已,
        兼設妙供養,
        及以五欲樂,
捐去四天下,
出家守一心,
        以修菩提道。
是王學道時,
        問彼明相佛:
         得佛力三昧?』
『安住何等法,
時佛說二法,
        如是應當修,
得此深妙定,
        施不思議樂。
聞佛說法已,
        踊躍充漏身,
        當得此三昧。
即發菩提心,
微密比丘者,
        蓮華上佛是,
若人信如來、
        不誹謗此經,
是人住佛境,
        疾得此三昧;
若人畏生死,
        心不著於我,
常修舍壓他,
        及毘婆舍那,
        疾得此三昧;
是人如此相,
安住慚、恐畏,
         常修於止、捨,
        竦得此寂定;
利智勤苦行,
觀法無增減,
        一切如虚空,
是聰慧菩薩,
        疾得此三昧;
不見諸法起,
        亦不見其盡,
        亦如夢幻等,
恒觀法無常,
        不久得此定;
常能勤習行,
        唯覩無生、滅,
不見法異相,
```

又如影響炎, 當得此三昧; 觀諸法平等, 無有差別相, 觀外亦復然, 内既無身想、 不見其名字, 亦無有生、滅, 若能如是觀, 疾得此三昧。 時微密比丘, 如是諦觀已, 其心常相續。 初中及後夜, 不久得此定, 既閏如來說, 即於一念頃, 而證此三昧。 即覩十方佛, 得不斷菩提, 具諸有為行, 其心漸清淨。 比丘在生死, **滿十六千劫**, 曾供無量億, 諸佛之世尊, 然後獲寂定, 得於無上道。」 佛告不空見: 「莫心疑、不信, 汝是聰哲人, 勿懷於異見。 爾時比丘者, 蓮華上佛是。 諸天及世人: 我今語於汝、 若欲觀一切, 無量諸法者, 是人應當修, 如此妙三昧; 若有人樂欲, 生無量功德, 施眾難思樂, 當特此三昧; 若人樂欲見, 十方三世佛, 當持此三昧; 復樂轉法輪, 具足諸相好, 若有人樂欲, 亦備眾善本, 深知牛死緣, 是以當勤持, 如此勝三昧; 若有人樂欲, 遠離諸惡趣, 為利眾生故, 當持此三昧; 如是善人等, 昔已曾供養, 非一、二與十, 無量億諸佛, 求最上菩提, 得持此三昧。 若人樂欲求, 正念聞三昧, 已曾多供養, 過去無量佛, 是人久勤修, 過去所行道。 聞說勝三昧, 若人於彼處, 即發歡喜心, 踊躍意無量, 昔已曾供養, 多億天中天。

若人於此經, 常修相續心, 讀誦及解說、 受持與書寫, 是人已曾見, 無量大明力。 譬如戰場所, 他陣放毒箭, 以聞藥鼓聲, 毒消得歡樂。 若人聞如是, 勝定妙三昧, 為他說此法, 得明三昧力, 當來必成佛, 唯除身證者。 如須彌功德, 依者同其色; 行者有深慧, 聞定亦復然。 若有人得聞, 最勝三昧聲, 斯人功德聚, 猶如大海量, 決定明三昧, 當得於菩提。 譬如江河水, 悉入於大海, 異本眾流相, 皆同一醎味; 若人聞如是, 微妙之三昧, 無異、無分別。 即同菩提性, 於多億劫中, 若有諸菩薩, 勤修行布施, 為利一切眾, 諸佛世依所, **廣植無量業**, 是諸菩薩等, 涉歷無數劫。 得福未為多, 雖行布施業, 慈心說三昧, 功德勝於彼。 此三昧亦然, 如母能生育, 諸佛之功德。 顯現難思議, 是人聰慧故, 常修此三昧, 不久當疾得, 無上自然佛。」◎

# 菩薩念佛三昧經卷第四

宋天竺三藏功德直譯

# ◎三法品第十二

爾時,不空見菩薩摩訶薩白佛言:「世尊!菩薩摩訶薩具足幾法得此三昧?」

世尊即告不空見言:「菩薩若能具足三法,得此諸佛所說三昧。何者為三?所謂:不貪、不瞋、不癡,如此善根。

「若是菩薩住於無貪,便得滿足檀波羅蜜。心得安住如此法已,攝 取不貪清淨善根,永離貧窮,恒得豪富,具大威勢,如日光曜。如 是,菩薩所修功德皆為一切諸眾生故,所可宣說無不信受,得此三 昧不以為難,亦當疾成無上菩提。菩薩具此妙善功德,天人敬信。

「菩薩若復能修不瞋善根之行,滿足忍辱波羅蜜也。若是菩薩安住 忍度,若人罵詈、刀杖加之、解其支節、斷其頭首,不生一念忿惱 之心,亦不說他諸惡過咎。攝取不瞋清淨善根,慈心為利一切眾 生,是以修行如此三昧。菩薩安住此三昧已,得與諸佛世尊常俱, 乃至夢中不離見佛,經、行、坐、臥皆獲安樂。諸天護念,不見惡 夢,寤寐歡喜。刀不能傷、毒亦不害、水所不潔、火所不燒,所資 四事恒得豐足。亦為一切皆令歡喜,疾當得於無上菩提。

「若是菩薩除捨無明、具足不癡善根之時,正觀修行毘婆舍那即便 攝取不癡善根,於一切法決定巧便,滿足般若波羅蜜也,他來問難 疾能答對。菩薩具足如是三法辣當得此三昧之寶。

「又,不空見!若是菩薩復具三法當得此定。何謂為三?應觀一切 諸行無常、應觀一切諸行皆苦、應觀一切諸法無我。菩薩具足如此 三法,當得斯定、疾成佛道。

「又,不空見!若是菩薩復具三法當得此定,疾成無上菩提之道。何者為三?所謂供養現在諸佛及以滅度如來舍利。若以花、香、幢蓋、繒幡、種種珍妙而以奉獻,若自供養、勸人令行。復應發願,作如是言:『以我善根布施因緣,願得諸佛所說三昧。』又,不空見!復當讚歎現在如來、般涅槃佛真實功德,讚戒功德、定、慧解脫、解脫知見、威儀、神通、教化辯才、阿蘭若行,及以慈悲喜捨之法。復更殊勝讚歎佛法儀容相好、無量功德。既讚歎已,復發願言:『若我讚歎諸佛功德設獲微福,以此善根當得諸佛所說三昧,疾當得成無上菩提。』

「又,不空見!菩薩摩訶薩於諸佛所聞此三昧功德、名字,有三隨喜。何謂為三?如過去佛往昔已曾修菩薩行、求阿耨多羅三藐三菩提,如彼諸佛求是三昧,我亦隨學求此三昧,亦為自利及利他人。聞三昧已即生隨喜:『我亦當復隨彼隨喜。』此是第一隨喜者也。又,不空見!如彼未來諸佛世尊亦當修習菩提之行,聞此三昧,自利、利他,生於隨喜:『我亦隨喜。』是名第二。若諸如來住現在世,安隱快樂,斷不善行,捨諸惡趣、變化、幻術、種種伎樂、圍碁博弈,一切諸惡悉皆離之,深定、大悲無不具足。如彼諸佛往昔已曾修菩薩行、聞此三昧即便求之生隨喜心,我今亦爾,如過去佛隨而喜之,是名第三。

「又,不空見!此三隨喜與發願俱:『若我所獲善根功德,願使眾生常得是定。』又,不空見!菩薩具足此三隨喜,亦當疾得如是三昧。又,不空見!若善男子、善女人等隨喜斯定,得此善根功德之聚。為此善根,以譬明之。如有一人以彼三千大千世界恒河沙為聚,於大聚中捻取一沙擲過無量不可思議億那由他無邊世界,復取一沙擲過無量無數世界,如是次第盡大沙聚。此諸世界,若善算師、算師弟子,能得邊際知其數不?」

時不空見即白佛言:「如此人者不能知也,唯舍利弗、不退菩薩, 乃能知此世界之量。」

告不空見:「不可思盡若干世界滿中珍寶,其高過於諸天所居,乃至非想非非想處,以此珍寶施諸眾生。此善男女得福多不?」

時不空見即白佛言:「甚多。世尊!無量無邊。」

爾時,佛告不空見言:「我當語汝,若善男女於諸佛剎滿中珍寶,以用施於一切眾生。若善男子、善女人等聞此三昧三隨喜已,發願求於無上菩提,亦復欲樂修於多聞,是善男子、善女人等所獲功德,勝彼施福無量無邊不可稱計。」

佛告不空見:「此念佛三昧即是一切善根之母。如是說者,名為正 說。」◎

## ◎菩薩念佛三昧經勸持品第十三

爾時,世尊告不空見:「乃往昔世過阿僧祇阿僧祇無邊大劫,爾時有佛,號寶勝光如來、應、正遍知、明行足、善逝、世間解、無上士、調御丈夫、天人師、佛、世尊,出現於世,無與等者,一切人天所共恭敬,解脫調伏,度生死岸,無上最勝第一世尊,為護一切世間之師,今世、後世皆悉明了,所可說法初、中、後善,其義深遠、其語巧妙,具足清白梵行之相。時寶勝光如來世尊於彼經行,與三萬億百千聲聞,皆住學地,人天恭敬。是寶勝光佛從臥而起,心生念言:『此諸聲聞皆住學地,當隨所樂為說深法,令彼速得盡諸有漏。』」

告不空見:「寶勝光佛即時便現大神通力,令此三千大千世界遍滿 其中皆成烟炎。是諸聲聞見此神變不生怖畏,皆大歡喜,譬如比丘 得四禪樂。」 告不空見:「寶勝光佛於夜後分為說法故,即現種種神通變化。時寶勝光佛告諸聲聞:『汝等比丘見此三千大千世界烟炎不耶?』比丘白佛:『唯然,已見。』『比丘當知,有為諸行無常、苦、空,一切諸法皆無有我。所以者何?此身不淨,九孔常流,臭穢充滿。諸行無常,輪轉之法危脆不堅,一念不住。生、老、病、死之所逼切,猶如幻炎、水聚泡沫,無人、無主,猶若草木,甚可患厭,應速遠離。』」

佛告不空見:「是三萬億百千聲聞聞寶勝光佛說是法時,是諸比丘 見法、住法,選擇善法,度四顛倒,於佛、法、僧得淨善法,能不 信他,皆得漏盡。時諸聲聞同聲白佛:『如是。世尊!有為諸行無 常、苦、空,一切諸法皆悉無我。此身不淨,九孔流溢,甚可厭 惡,應速捨離。誠如聖教,誠如聖教。』

「又,不空見!有三示現:神通示現、教詔示現、說法示現。時寶勝光佛以此示現如是,調伏諸聲聞眾度三脫門——空、無相、願——及三萬億百千那由他諸菩薩等,皆當得成無上菩提。」

告不空見:「是諸菩薩聞彼世尊說寶三昧,<mark>開</mark>化人天八萬四千億百千歲。轉法輪已,然後滅度。」

時不空見白佛言:「世尊!彼寶勝光如來出世,調伏聲聞為有幾何?正法、像法住世幾歲?」

爾時,世尊告不空見:「如是三千大千世界一切星宿可知其數,寶勝光佛諸聲聞眾無量無數,不可限量。寶勝光佛般涅槃後,正法住世足八十億那由他歲,像法住世十二億歲。於是中間有佛出世,號曰慈行,壽不可稱量。其佛身長足一由延,國人身量六拘盧舍。蓮花問圓亦復如是,悉以此花遍布大地,一切眾生遊息其上。

「爾時,世界名多蓮花。其地柔軟,猶如鹿茸,若觸身時,狀若天衣,一切眾生快樂無極。又如自在諸天宮殿,是諸眾生欲度東海, 眴頃之間便到彼岸;南、西、北方亦復如是。若有眾生凡欲所之, 發心即至。

「是寶勝光佛初成道已,時四海內其地縱廣,足八萬億百千那由 他。諸聲聞眾悉滿其中,諸阿羅漢皆各一食,唯除阿難、金剛密迹 及阿逸多。八十那由他不退菩薩請彼慈行如來世尊為諸菩薩說此三 昧。將欲分別顯示之時,一音之中而說偈言:

「『若人勤方便, 求習出家行,

競修最勝法, 摧破四魔軍,

猶如大象王, 踐踏眾小草。

若人欲疾得, 寂定菩提道,

為諸眾生故, 修行此三昧。

敷演淨妙法, 施彼一切樂,

是人則與佛, 同其大悲心。』

「爾時,慈行佛般涅槃後,有一比丘名曰樹王,於正法中廣宣流布 是妙經典三昧寶王。有轉輪王號帝幢天,有大威德,政法治世。是 王有城名帝幢處,縱廣正等十二由延,城郭、樓觀皆是真金,種種 綵畫、眾寶莊嚴。其城四面各有三門,國界嚴飾如善建城。

「又,不空見!時王帝幢於夜後分眠寐之中,有淨居天來至其所, 即於夢中而告之曰:『大王當知,有三昧名諸佛所說念佛三昧。若 有菩薩修是三昧,恒生淨土,不離見佛,世、出世辯無不具足,必 當疾得無上菩提。』時王忽然於夢驚寤,猶見此天故在其前,即白 天曰:『誰能受持如是甚深念佛三昧?』天告王曰:『去此不遠有 大比丘名曰樹王,常樂受持、讀誦、敷演、如說修行是深三昧。』

「爾時,帝幢從彼天所受此三昧及比丘名,至心憶持,不令忘失。即於晨朝捨四天下、金輪、七寶,及八萬億無數百千宮人、婇女,

為求三昧甚深法故,即與眷屬同時捨家,俱共往詣樹王比丘。

「又,不空見!時彼四眾、天龍八部皆共圍遶,有九萬億欲界諸 天、八萬那由他諸菩薩等,亦與眷屬恭敬圍遶。樹王比丘時為大眾 說此甚深念佛三昧。帝幢大王即至其所,以天真寶散比丘上,五體 投地,至心頂禮。復持八萬淨妙金花、天曼陀羅、沈水末香,又以 敬心奉散比丘。供養既畢,即與眷屬皆悉出家,被淨法服。為欲修 習此三昧故,供養恒沙無量諸佛,與其眷屬求是三昧。八萬四千億 那由歲,衣服、飲食及諸珍寶親近供養樹王比丘,常自受持、讀 誦、解說、如說修行是妙三昧,亦化一切無量眾生,大悲為心,初 無懈倦。

「帝幢菩薩及其眷屬聞樹王師說此妙法,至心受持,未曾暫捨,深生恭敬,恒如佛想,精勤修習,初不休息。樹王比丘皆悉成就彼八萬億百千比丘修菩薩行,住不退地,然後滅度。彼諸眷屬皆亦命過。

「爾時,復有佛出於世,號閻浮幢如來世尊,十號具足。帝幢比丘 既值世尊,供養、恭敬,諮稟如是甚深三昧,受持、讀誦、如說修 行,饒益一切人天世間,皆得無上菩提大利。帝幢比丘廣宣流布諸 佛所說甚深定故,過三千劫當成正覺,又能成就九億百千那由他等 無量眷屬,皆悉安住不退菩提。」

爾時,世尊告不空見:「時帝幢王大比丘者豈異人乎?今現成佛,號曰高行如來、世尊、應、正遍知,十號具足。

「又,不空見!汝今當知,以是三昧威神勢力饒益如是無量眾生, 以少聞故,常值佛世。又,不空見!若有菩薩少得聞此三昧名故, 常值佛世。何況菩薩於今現在若得聞遇此三昧經,受持、讀誦?其 福如上已不可量,何況復能廣聞受持、讀誦、解說、如說修行? 「又,不空見!若有菩薩乘於大乘、辟支佛乘,及聲聞乘、人天之乘。若善男子、善女人等或得暫聞是妙三昧,是諸菩薩及善男女皆當疾得無上正覺。又,不空見!是諸人等,譬如有人在閻浮提見彼明相,決定必知日出不久,大光普照,閻浮提人因日光明能得分別青、黄等色。如是,不空見!若有行者略聞諸佛所說三昧,是善男子、善女人等不久當得無上菩提,猶彼明相知日必出。汝當深信此妙三昧,受持憶念,勿生疑惑。

「又,不空見!善男子等,如劫將盡六日出時,一切大地皆成煙 焰;七日出時,三千大千世界之中一切洞然。如是,不空見!善男 女等學大乘者、有不學者,若得少聞此三昧寶,書、持、讀誦、解 說其義,皆當疾得無上菩提。又,不空見!善男子等,譬如掘井, 若見淤渠必定知水不復遠也。

「又,不空見!若有菩薩及諸眾生,於佛所說念佛三昧,應當書 寫、受持、讀誦、解說其義、如說修行、憶而不忘,是善男子、善 女人等不久疾得無上菩提。

「又,不空見!善男子等,譬如有人吞金剛丸,時諸聰慧善男子等 必知此人定死不久,以此金剛極難消故。如是,不空見!善男子 等,若人於是妙三昧寶受持、讀誦、廣說深義、乃至少聞三昧妙 法,此善男子、善女人等不久當得無上菩提。所以者何?諸佛所說 念佛三昧如金剛故,過去、未來、現在諸佛、應、正遍知之所宣 說、分別選擇、威神守護,令諸行者不失作業。菩薩應當如是修 習,恒欲利益一切世間,是名菩薩乘此樂行。如忉利天歡喜之園, 若有見者身心踊悅。菩薩如是、得此三昧疾成無上菩提正覺,於所 未聞諸章句等,若欲習學得亦不難。妙哉!往古一切諸佛為利益故 分別示現,令滿句義,安住法界。諸大菩薩攝持擁護,敷演教化, 令樂正道。如是法門次第儀式,菩薩大士皆應當知。 「又,不空見!若有菩薩於此諸佛所說三昧若少聞者,是諸人等皆當疾得無上菩提。又,不空見!是故我今為汝分別開示演說。汝又當知,若得聞此諸佛所說念佛三昧,受持、解說,不久疾得無上正覺菩提之道。是故汝今應當受持、讀誦、修行,乃至書寫,亦當廣為一切四眾,國王、大臣、沙門、婆羅門,及諸異學分別解說。所以者何?此等若聞,當得滿足無上菩提。

「又,不空見!若善男子、善女人等,應當決定至心淨信此深三 昧。所以者何?皆是往古一切諸佛之所稱讚。汝今當以不思議意至 心憶持,深信此定,精勤修習,令心相續。所以者何?此三昧者, 皆是諸佛真實之說。隨順佛說至佛行處,選擇分別佛所證知甚深寶 財一一諸佛本事、往生因緣、諸佛法藏、究竟秘密、諸佛聖印、如 實知性、諸佛真身。

「又,不空見!此三昧者,出生行人無量善根,恒得生於大剎利 家、大婆羅門及餘勝家,得大威力,終成菩提。所以者何?諸佛所 說念佛三昧甚深妙典,能施眾生不虛果故,亦令行者得無邊福。若 有聞者,是人獲得無量無邊阿僧祇等不可思議諸功德聚。

「又,不空見!我今當說譬況之法,成滿此義,如有智人聞譬則解。猶若大施,諸菩薩等常於清旦及以中、晡,日皆三時,如來三 昧憶念力故,以諸珍妙、一切雜寶遍滿恒沙大千世界,常以奉施億 千恒沙如來世尊及聲聞眾,經百千億那由他等恒河沙劫如是大施, 以求阿耨多羅三藐三菩提。」

告不空見:「此大菩薩所得功德寧為多不?」

不空見言:「甚多。世尊!無量無邊,不可思議。」

告不空見:「我當為汝分別解說此施善根。如此諸佛所說三昧,第 一真實,佛口所說,若能書寫、受持、讀誦、敷演、分別解說之 者,出生無量諸功德聚,比前功德其福甚多。何況聞已勸人受持、廣為四眾分別解說?又,不空見!我今說此功德寶聚不可窮盡。」

# 菩薩念佛三昧經諸菩薩本行品第十四

爾時,不空見菩薩、善現菩薩、善太皇帝薩、無量不現菩薩、無量的菩薩、無量帽菩薩、無量明菩薩、無量問菩薩、無量官菩薩、無量官菩薩、無量官菩薩、無量宣菩薩、分別一切法意菩薩、分別虛空意菩薩、分別無著意菩薩、無量寶意菩薩、一切寂定自在菩薩、善教詔意菩薩,如是等比九萬百千億那由他,此諸菩薩而為上首,即從坐起,更正衣服,右膝著地,合掌恭敬白佛言:「世尊!我等於此諸佛所說菩薩念佛甚深三昧,憶念、受持、書寫、讀誦、廣分別說、如說修行,令心相續乃至菩提,常當受持、分別宣說。所以者何?我等皆於諸佛所說甚深經典、種種相貌未曾滿足。若有多人於樂勤修,則能增長、建立安樂。所以者何?若能次第修行是法,書寫、讀誦,亦教他人受持、解說,必能滿足無上菩提,漸漸增進成就無餘。」

爾時,世尊知諸菩薩摩訶薩等心之所念,以佛常法即現微笑,於其面門放雜寶光,所謂金、銀、琉璃、車璩、馬瑙、珊瑚、虎珀、赤真珠寶,種種無量微妙眾色。其光普照無量世界明耀朗徹,乃至梵世,從上還下,住佛頂上。譬如淨喜天寶帝幢微妙脩直,甚可愛樂。此剎三千大千世界皆悉莊嚴,猶若瓔珞。

爾時,大眾、諸菩薩等覩斯神變,咸共驚歎:「善哉!希有如來神通。」

時有菩薩摩訶薩,名慚愧安定發眾意行,即整衣服,右膝著地,恭 敬合掌,瞻仰世尊,以天沈水、細末妙香及天曼陀奉散世尊,即於 佛前而說偈言:

「調御無與等, 色身妙相嚴, 猶如天花樹, 香氣猵十方。 具足善行意, 修習無量智, 調御大威尊, 愍利諸惡趣。 唯願無量智, 為說微笑緣。 最勝無邊智, 大威無等等, 何故現微笑? 願說其因緣。 此三千大千, 一切諸世界, 淨若忉利天, 嚴飾如茫纓, 見者皆歡悅。 何因現斯笑? 盲瞑得明視、 **聲者獲聰聽、** 喑啞皆能言。 狂亂 果正念、 示現斯微笑? 以何因緣故, 象、馬及眾鳥, 皆發和雅音, 一切諸樂器, 不鼓而自聲。 今以何因故, 天尊忽微笑? 及下世間人, 上方諸天等, 一切妙音樂, 悉演殊美聲。 何因示斯笑? 唯願為顯說。 善哉! 甚希有, 人天皆相見。 以何因緣故, 示現此微笑? 矜愍眾生故, 調御兩足尊, 願聞尊笑意, 今我得淨善。」

爾時,世尊知慚愧安定發眾意行菩薩及餘大士請問意故,佛即宣說如恒沙等應正遍知之所說偈:

「告諸菩薩眾, 汝等且應觀: 彼六萬八千, 諸善男子等, 往昔已墮落, 今還修菩提。 皆誓言:『我等, 各住牛死中, 當受持此經。 當來牟尼所, 最勝不思議, 皆樂聞此典, 心常無厭足。』 諸佛所說法, 我今當告汝: 此諸菩薩眾, 發斯深敬心。 非唯一佛所, 三萬六億等, 憶念於往昔, 百千那由生, 為攝法利故,

爾時於是處, 初起一切行。 又於彼前生, 恒沙大智所, 是 處初起行, 攝取最勝法。 心常不滿足, 明慧人求法, 恒捨身命、財, 以求菩提道。 憶昔恒沙等, 不可思議劫, 時有正覺尊, 無量大勝光, 是處初起行, 為求法利故。 又於寶勝炎、 大明及電光、 是等大仙所, 難思照一切, 三業持此法, 為攝最勝道。 日光及月光、 難思功德海、 具足一切行, 如是諸佛所, 是處初發心, 為求勝菩提。 又於彼前生, 值遇猛盛光, 及與師子佛, 於彼如來所, 三業受斯法, 求第一菩提。 於彼過去世, 諸佛恒相繼, 師子幢如來, 功德悉具足, 是處又發心, 為求法利故。 復有他方佛, 號日勝帝幢, 調伏聞世間, 於彼諸佛所, 為求勝法故, 攝取無上慧、 無量智生等, 不思議諸佛, 法音聞高遠, 如是世尊所, 三業受斯法, 求第一菩提。 猶無邊火幢, 昔於善眼佛, 發此猛利心, 求無量菩提。 又於光力王, 變化神剎十, 住是大仙所, 以求勝菩提。 無量相德明, 光炎生調御, 於彼初發心, 求此三昧寶。 炎光及大眾、 明聚、降怨佛, 如是世尊所, 求法施眾樂。 一切光如來、 難思及日明、 無量力善逝、 無邊定意佛, 於彼諸世尊, 發心施法樂。 善花香正覺、 金花大聖尊、

阿蘭若行佛、 無漏如來等, 如是諸佛所, 敬求最勝道。 此方及他剎, 過去無量智, 於彼兩足尊, 受持此三昧。 身、口、意勤修, 求第一菩提, 以此諸善業, 供養天中尊, 常求無上道。 具足滿八萬, 是諸菩薩等, 死此離惡道, 一切共俱生, 恒奉人天尊。 不牛卑賤家, 永離邪惑法, 遠離惡知識, 親近於善友, 攝取諸功德, 乃至於菩提。 當於未來世, 值遇彌勒尊, 供養天中天, 攝取勝菩提。 師子佛調御, 慈氏 尊滅後, 於彼世尊所, 為法淨三業, 攝持諸勝行, 以求正覺道。 賢劫中千佛, 無上兩足尊, 當為此菩薩, 官說深妙法, 是諸善逝子, 必獲無礙色。 過此賢劫已, 無量光如來、 相繼出于世。 月顯及腎觀, 其間甚久遠, 腎觀佛滅度, 多羅幢如來, 紹繼廣開化, 彼諸敏慧人, 為法設妙供。 多羅大聖尊, 既入干涅槃, 分别世如來, 其後次成佛, 為深三昧故, 奉敬彼法王。 示現尊出世, 分別佛滅後, 示現聖日沒, 花上世所依, 次第成正覺, 當牛一切見。 花上既善逝, 優鉢羅勝佛, 出現調世間, 當供兩足尊。 優鉢羅滅度, 拘修摩世依, 其次成菩提。 彼佛慧日沒, 於是出于世。 莊嚴大勢尊, 莊嚴聖眼滅, 次有眾智勝, 於彼為法故, 廣設無量供。

眾智勝滅後, 善現佛大智, 當興干世間。 善現泥曰已, 次為調御尊。 妙持世依師, 妙持如來後, 善圍遶世尊, 第一智當興, 於彼求菩提。 善圍撓佛滅, 無量光下覺、 大勝無邊明、 現前最法王, 如是三調御, 相繼出于世。 現前慧日沒, 最熾念王興, 為此法利故, 供養難思議。 一切世主上, 知彼當來佛, 為求法壽命。 受行此菩提, 以是諸善業, 於此界命終, 得供無量壽, 大威降怨佛。 既值人中尊, 廣設無邊供, 為得法義利, 攝第一菩提。 住彼諸世界, 眾多世智所, 為利益眾生, 不求五欲樂。 奉敬多億佛, 當成無礙智, 憐愍脫眾苦, 安樂諸世間。 彼剎廣難議, 獲最勝菩提, 無邊淨妙樂。 眾寶妙莊嚴, 是諸菩薩等, 若億那由他, 讚人中法王, 不思議佛智。 我今告汝等, 諸天及世人, 則與如來等。 若求學佛智, 求習勝菩提; 是人樂佛智, 應獲人尊法。 以求菩提故, 諸天、龍、夜叉、 迦留、摩睺羅, 及諸抅槃茶, 常深護佛法。 護法應如子。 若人求菩提, 若求佛菩提, 則得大果力, 端嚴甚殊妙, 色像如直金。 常為一切眾, 普慧深遠義, 具足不思議, 一切諸功德。 淨色百福嚴, 世間最上寶, 龍、鬼莫能議。 人天無比尊, 是人依菩提, 得供最勝仙,

## 為利眾生故, 開示深定法。」

## 菩薩念佛三昧經正念品第十五

爾時,眾中思義菩薩、捨非義菩薩、心勇健菩薩、分別心菩薩、無慳意菩薩、拔煩惱菩薩、善思義菩薩、眾智菩薩、無縛菩薩、眾光菩薩、智燈光菩薩、造智知識菩薩、無等煩惱菩薩,帝幢天子、他化天子,皆共恭敬而白世尊:「今言諸佛之所說者,何故名為諸佛所說?云何諸佛?何者是佛?當云何念,名為念佛?為起身念?為起法念?」

爾時,世尊告諸菩薩:「善哉,善哉!諸善男子!汝等所問甚深難思,皆是承佛威神之力,生此樂說無礙辯才。諸佛所說,名為佛說。正念諸法真實之相,是名念佛。何謂正念?莫著一切諸惡、誹謗,應修一切無譏謗法,當離於我及以非我,不見眾生、壽命、宰主、育養、士夫、人及生者,莫著作者、使作之者、陰、界、諸人、想所緣處。於一切法,今世、後世乃至三界,無依、無染我見,諸行無取、無捨,禪定、解脫及六神通、如意、根、力、菩提覺分、毘舍羅等無量善法,略說九萬億那由他不可思議甚深三昧。一切諸佛常所念法——佛方便慧——隨而書寫、讀誦、敷演方等經典,說佛功德,名佛所說。」

# 爾時,世尊即說偈言:

「常能捨一切, 有為虛危相, 不得諸法性, 則獲是三昧; 莫著諸誹謗、 及憶想分別, 永離我、我所, 如是得三昧。 不於諸陰法, 見眾生、壽命等, 我、人及起者、 士夫、養育等, 亦無分別想, 是名為說法。 於諸法不染, 則得此三昧。

```
色、受、想、行、識, 一切空無相,
根本皆不淨,
        知此得三昧。
觀諸有為法,
        從緣不自在,
一切不真實,
        虚誑不可取。
        是則名眼入;
如彼從緣法,
耳、鼻等亦爾,
         皆無有自性。
        得生此三昧。
若能諦分別,
        陰聚無一淨,
是身虚無實,
力孔 流膿、血,
         誰當樂此處?
        虚妄常如幻,
意入念念滅,
若能深分別,
        則得是三昧。
一切諸入等,
        皆空無有實,
凡夫猶小兒,
        癡惑計有身。
貪愛之所迷,
        不知是虚妄,
        眾賊之所止。
是身如空聚,
可患虚誑法,
        智者常厭離,
        則得是三昧。
如是深觀察,
陰界入諸法,
       皆空無一實,
若人能分別,
        得生此三昧。
如炎、泡、聚沫、
          幻、化、芭蕉等,
        不實倍於此。
當觀身危脆,
若此諸菩薩,
        如是智不毁,
疾得一切佛,
        所說深三昧。
        亦不從他有,
諸法不自生,
畢竟無所住,
        無漏法亦然。
        則生此三昧。
若能如是觀,
        諸行變異相,
捨一切有為,
此法如虚空,
        牛者不可得。
        修學一切法,
菩薩如是知,
疾得勝菩提,
        轉無上法輪。
是菩薩則能,
        建立於法幢,
以不思議智,
        分别一切法,
皆見是虚誑,
        畢竟不直實。
我今雖為汝,
        宣示此三昧,
如是儀式相,
        其義甚難知。」
```

爾時,世尊說此法時,有諸菩薩得無生忍,又復安住念佛三昧。是諸菩薩皆見東方如恒沙等諸佛世尊說此三昧,清淨平等,無增、無減,無二、無異;其餘諸方亦復如是,皆有無量億那由他如來世尊,俱時皆演諸佛所說念佛三昧。時諸菩薩聞佛所說,身心歡喜,快得安樂,不勝踊躍,即於佛前重以偈頌說其相貌:

「歸命世光明, 正覺牟尼尊。 釋迦佛智海, 大法聖醫王, 人依師子王, 普示諸色相。 見彼東方剎, 那由他諸佛, 悲愍眾生故, 說法如師子。 如是諸菩薩, 調伏那由他, 安住童直地、 得無生法忍、 善順甚深性、 於法無所壞。 其餘九方等, 相貌亦如是, 悉見多億眾, 那由他諸佛。 譬如師子王, 恐畏之所依, 無漏、寂無等, 轉第一法輪。 其相亦不住, 是處無去、來, 一切法無實, 性空無生、滅。 眾生及壽命、 十夫亦如是; 一切陰界入, 無實如空捲。 譬如諸野獸, 畢竟無所依。 或有常不淨, 諸法實無生, 穢心貪生死, 如彼癡嬰兒。 多億那由劫, 恒苦而不厭, 是以佛慈悲, 為此說菩提。 是故諸佛子, 常捨身、手、足、 頭、目、及髓、腦, 妻、息、妙珍寶, 以此行菩提。 皆悉能棄捨, 既能施妻子、 眷屬、諸外財, 又棄天世位、 身、肉、及筋、骨, 能捨是難捨, 疾得成正覺。 施、戒最勝果, 忍、進、禪、慧等, 行慈、悲、喜、捨, 以求無上智。 菩薩應修是, 為利眾生故。」

#### 爾時,世尊即以偈頌答諸菩薩:

「菩薩若多劫,修行是真如, 不異、不分別,以此說菩提。 其性甚寂靜,難得、難可見。 當起無盡意,修習如是行, 是菩薩則得,進智近菩提。」

爾時,世尊為諸菩薩略說四法——滿菩提故——而告之言:「諸善男子!當學戒品,善自防慎守護觀察;生智方便,常勤修習乃至菩提;於諸眾生恒起慈心;為除我見及我所想,求於最勝無上菩提。乃至捨身及以命財,應當守護、成就、增長。如是四法,三昧根本。」

# 菩薩念佛三昧經大眾奉持品第十六

爾時,世尊知九萬億那由他等諸大菩薩摩訶薩眾皆悉已集,復有百千萬億菩薩,是等當於彌勒佛時悉得住於不退轉地。是時東方九萬九億百千那由他諸菩薩眾,梵上菩薩而為上首;南方復有九萬九億諸菩薩眾,持誠菩薩摩訶薩等而為上首;西方復有九萬九千諸菩薩眾,大智菩薩摩訶薩等而為上首;北方復有九萬九千諸菩薩眾,大光菩薩摩訶薩等而為上首。

復有住彼歡喜世界無量菩薩皆悉來集, 梵身天王、大花梵王, 無量 梵王皆悉來集。復有無邊百千那由他釋提桓因, 眾念天主而為上 首。復有無量百千億萬那由他等四大天王, 復有無量迦流夜叉、持 鬘夜叉、常醉夜叉。復有諸餘天、龍、夜叉、乾闥婆王、阿修羅 王、迦留羅王、緊那羅王、摩睺羅王、羅剎夜叉、拘槃茶鬼、富丹 那鬼, 及與迦吒富丹那鬼, 如是種種無數百千大力鬼神亦來在座。

爾時,世尊、應、正遍知知諸大眾皆悉已集,將為此等略說斯經功德深重次第之法,為欲調伏諸人天故,復作師子[口\*磬]咳之聲,

即為時會說未曾有:「此經法者,去、來、現在三世諸佛之所修行,能滅一切諸大苦惱。是故諸佛尊重是法,已行、當行、今亦修行。是故,大士!欲求我身應當尊重真實之法,敬事法者當如敬佛。所以者何?法不異佛。是人求法應到於此。若天、若龍、人及非人,能求法者疾捨諸苦。行法除苦,佛說最勝。是故,菩薩為欲利益一切世間求菩提法,是諸菩薩則為已施一切眾生菩提之樂,疾得度於生死大海。

「當我須臾說此三昧微妙經王教世間時,一切山河及以大地皆悉俱時六種震動,時諸眾生皆稱善哉。所以者何?當佛說此菩薩念佛大三昧王,大乘方等微妙經典,無邊功德大智海時,億百千數那由他等無數世界佛之剎土,皆悉六種十八相動,及放淨光大明普照。」

爾時,虛空無量諸天擊大天鼓,聲若雷震,又奏和雅調暢之音。復有八萬億那由他地神、天女,持眾寶座從地踊出,至世尊前至心恭敬而以奉獻。復有主樂乾闥婆王,作億百千那由他等種種妙音,甚可愛樂。復有諸龍及龍王子,興大密雲普覆世界,雨天曼陀及眾妙花周布大地,高百由延。時娑竭羅諸大龍王於虛空中變成宮殿,眾寶莊校微妙殊特,天栴檀末普散此剎三千大千佛之世界。復有色界諸梵天王,於如來上作寶花蓋,遍覆三千大千剎土。是蓋處處垂諸寶鈴,其鈴皆出微妙之音,譬如他化自在天樂。

爾時,此會一切眾生皆修慈、悲、喜、捨之心,既聞法音,不勝喜悅,各各至心重歸三寶。時會聞法無邊眾生,皆發無上菩提之心;復有無量諸眾生等,悉深發辟支佛心;復有無數諸眾生等,皆發聲聞菩提之心;復有無量諸剎利王、沙門、婆羅門、毘舍首陀、長者、居士,皆悉獲得須陀洹果、斯陀含果、阿那含果;復有無邊諸眾生等,皆證無著阿羅漢果。

爾時,世尊說是經已,一切大眾皆大歡喜。

不空見等諸大菩薩,大聲聞眾,及諸世間人天八部、阿修羅等,聞 佛所說,皆大欣樂,頂戴奉行。

菩薩念佛三昧經卷第五

## CBETA 贊助資訊

(http://www.cbeta.org/donation/index.php)

自 2001 年 2 月 1 日起, CBETA 帳務由「財團法人西蓮教育基金會」承辦,並成立「財團法人西蓮教育基金會」- CBETA 專戶, 所有捐款至 CBETA 專戶皆為專款專用,歡迎各界捐款贊助。

您的捐款本協會皆會開立收據,此收據可在年度中申報個人或企業的綜合所得稅減免。 感恩諸位大德的善心善行,以及您為佛典電子 化所做的一切貢獻。

## 信用卡線上捐款

本線上捐款與聯合信用卡中心合作,資料傳送採用 SSL (Secure Socket Layer) 傳輸加密,讓您能夠安全安心地進行線上捐款動作。

## 前往捐款

# 信用卡 (單次 / 定期定額) 捐款

本授權書可提供單次捐款或定期定額捐款之用途。

請於下載並填妥捐款授權書後,請傳真至 02-2383-0649,並請來 電 02-2383-2182 確認。

或掛號寄至 10044 台灣台北市中正區延平南路 77 號 8 樓 R812 財團法人西蓮教育基金會收。

請在此下載 授權書 (MS Word 格式)

## 劃撥捐款

郵政劃撥帳號:19538811

戶名: 財團法人西蓮教育基金會

欲指定特殊用途者,請特別註明,我們會專款專用。

# 線上信用卡 / PayPal 捐款

PayPal 是一個跨國線上付款機制的公司, CBETA 引用其服務,提供網友能在線上使用信用卡或 PayPal 帳戶贊助 CBETA。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project.

相關收據開立事宜,由於付款幣別為美元,我們除了會依您所贊助之美元金額開立收據外,另我們會依捐款當日公告匯率開立台幣收據,此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

# <u>線上信用卡 / PayPal 贊助</u>

# 支票捐款

支票抬頭請填寫「財團法人西蓮教育基金會」。

CBETA is part of Seeland Educational projects, any donation (ex-cheques, remittance, etc.,) please entitle to "The Seeland Education Foundation".